

# *TI OKHUMA WA NSUWA*

 Nrowe nuuramihe muru ahu. Pwiya, nithukumanne-ene va voosiis'ula wooreera wa Paasikha, noonaka ithutu sipaceryaka ophuwa, enwi ekelaka ekuxaka mpantte aya, axipalame yiipaka ntoko wira mirima saya saarowa ophutuwa ni ohakalala, okhala wira ookhala Paasikha. Hiyo ninnaamini wira Nyuwo moomuhihimuxa Yesu mw'alipa-oohkwa, miyaakha sinci-ene sivinre, olelo, ni ninthapela nihiku nla na muupuxeryo.

<sup>2</sup> Ni mutthuniherye akhale Paasikha eriyari ahu hiyo othene, olelo. Mutthuniherye wira hiyo, ntoko arumeyi Awe, niiwe saana Masu Awe, wira hiyo naari moopathanani mw'Awe okathi ule, ni wira vano hiyo noohihimuwa ni Yoowo nikilaanthe vamosa mapuro a Wirimu.

<sup>3</sup> Mureerihe muteko va mutapernakulu, ni mwa ilapo sikina omphiyaaya, ni telefooni ola.

<sup>4</sup> Mwaavonihe aretta othene n'ale ooriipiwa murima. Wira akhale Paasikha wa yaawo, nave, ni okhuma mw'erettani mpakha ikuru. N'ale akhwiiye mutampini ni soottheka, awo akhale akumi olelo mwa Kristu. Nto hiyo ninimoovuwihani Nyuwo, vano hiyo ninvekela mwa Nsina Nawe. Amen.

<sup>5</sup> Vekeekhai kinnitthokelela ola okhala mureerelo woothamaleya, voosiisu ula okhala-tho nno oJeffersonville, Indiana, ni muthukumano ola muulupale, ekereja yoosarya ni atthu yeemenle, ni mapuro othene ni vate, ni vampwehiwa ikaaro ni mapuro othene. Wa nyuwo atthu mutelefoonini mulaponi mothene, ola voosiisu wooreera va.

<sup>6</sup> Ewoora yaneethanu voosiisu ula, mpatthani aka mwaamukhaani orina ethirima yooxeerya aahivavela vacanelani khukivenxa. Yaakhala wira murima awe mwaamukhaani waamphuleya, airaka, "Owo ooohihimuwa." Kweekwe kinnimuupuwelaka mwaapalame ola okhala mpatthani aka, okhala wira onnikisivel.

<sup>7</sup> Ntoko ehimale-aya ehantisi ya yoowo wira, "Aahikhala mwaapalame mmosa ookhwila aamoonale Owo ahaawaka vamwiikimanyo, vaavo etampi yaamuhenlyaya-vo Yoowo." Vekeekhai, mwaapalame mwaamukhaani khaarina etampi. Owo khaarina yo omukhwela mwaapalame mwaamukhaani. "Masi owo aahivavela vamwiikimanyo khuphavela ophela iperek, ni munupi awe mukhaani, vano ekuuku awe yothene khukhala yooxeerya." Ni ti siiso kintthunaaka yawaka, nave, ntoko eyaakiheryo, yo ophavela okhapelela Etthu ila yoovuwa Owo okhwelenle-awe.

<sup>8</sup> Nisuwelaka wira okathi ahu ti wowaalakeya va, vancienexa w'axipatthani ale aniiwa mutelefoonini yeela, kaatthuna kootthokeleliheni voosiis'ula wa e—elatarato ekumihijiwe ni kaamera woovira okathi vakhani, ya yoowoonaa kaakhalanne aka va otapernakulu, yo okhuma oIndiana, orowa wArizona; weiwo kaarowaaka okumanana, ni ekhalelo y'epiraamite, Malaikha mathanu na manli. Kihisuwelaka exeeni yaarowa okhumelela ohoolo waya, nuuphiya iwe, kuupuwelaka wira yaarowa okhala emalelo y'ekumi aka, tthiri khaavo aarowa owerya ovilela erumelo eyo; ni kookupali wira nyuwo othene munnimusuwela wahala ene. Vano nto Okhatoni Sabino, voosiisu omosa ntoko ola, kivekelaka, aahikhala xoowa aaheliwe mmatatani mwaka, nto khwira, “Ala Masu, ni Xoowa a Masu.”

<sup>9</sup> Ohoolo waya, Malaikha yaahikhumelela ntoko saalaleeriweaya. Okathi ene yoowo, ethukumanyeyo yuulupale ya Waarya khukhuma veemenlyaka-vo, khweetta ikilomo miloko mixexe ni thanu na tthaaru osulu, khupaka ntoko nreko, ntoko mapupha a Malaikha, ni khukweretha osulu mukhalelo w'epiraamite mwa nikhuru nenlo na Malaikha naakhumelenle.

<sup>10</sup> Siyensiya ookumiherya elatarato, okhuma oMeexiku, okathi weettaaya okhuma onkela epheyo wa wArizona, weiwo Erooho Yoowaarya yaahimme-aya wira miyo kaamukhala keemenle, “ikilomo miloko mithanu na mosa ni xexe onkela epheyo wa oTucson.” Ni khuwela osulu, nto erekista *Life* khulaleerya ilatarato sene, “Etthu yootikiniha musulu, weiwo wahaakhanle okhalaka-wo enaanelo, weiwo wahaakhanle okhalaka-wo nikupettthe na etthu; ikilomo miloko mixexe ni thanu na tthaaru orakama, ni ikilomo miloko mixexe ni tthaaru etaphuwelo,” nirwaaka okhuma weiwo yaari Malaikha ale.

<sup>11</sup> Vano, awo khukoha, wira esuwele. Siyensiya, mmosa a yaawo oTucson wu, aathuna osuwela nikhamma yaanihimya etthu, masi miyo khuhaaleela. Nyuwo othene mwaahisuwela, yaahihimmwa khalayi ene. Masi khayaari ya yaawo; yaari yawinyu.

<sup>12</sup> Nto siiso Owo khulavula ni miyo, khwira, “Ikanyeryo Thantu na piili sinootaphuliwa. Isiiri thanu na piili, esiiri yoowipithihiha vaara vathanu na vaili ya mBibiliani, ethukiwe okhuma opattuxiwaka-ru olumwenku, enoorowa wuupululiwa.” Nto hiyo, niryeeene nikhuru noowiiyeviha naamukhaani, voolikanyiha n'ulumwenku wothene, hiyo ninnipuha iparakha iya, wiiwa isiiri iyo. Othelana, omwalana, epyo ya enowa, sookoha iya sothene soohiyana-hiyana, nihuupululeliwa voomalela, kahi ni mutthu, masi ni Muluku, Mwaneene, otaphunle isiiri iyo thanu na piili; wa ele yaari Ekereja, moota Eyo yaary'aya mwa Kristu wopaceryani, ni moota Eyo yaarowaaya wuupululiwa nihiku nookiserya.

<sup>13</sup> Nto vano, okathi ela yaawelaaya, nookhalana elatarato

ene ota vanipaweni. Masi, nto, kookhalana elatarato ene eri va, mwaweha vale, ntoko erekista *Life* yaakumihenrye-aya. Masi kinnikoha vakhala wira muthukumano aka, onooneya va, vekeekhai wootoko oweha elatarato ene, moone, enamuna yaatthuneyaaya.

<sup>14</sup> Muupuwele, miyo kaamulaleya okathi yoowoona ela yaarwiye-aya, mwaha wa Eliivuru ya Wiisuupulula, vaavo aphuki a khalayi, vaavo nimoona-ahu Yesu mwa Wiisuupulula 1. Okathi opacenrye-ahu otaphula Ikanyeryo Thanu na piili...ahiiso o—ahiiso Okathi wa Ekereja, kiireke, sihinatthi otaphuliwa Ikanyeryo Thanu na piili. Kristu eemenle ni “maihi ntoko manri, ootteela.” Nto miyo kaahoolakiheranyi yeeyo, wira aphuki a khalayi Ankelesi, ni aphuki a khalayi, okathi waaraowaaya opwaro wa milattu, wira yalaphele, okhulupale aya woomalela yaanivahiwa. Yaawara eperuuka yootteela, ntoko saari-aya, vamuru vaya, wira yooniherye okhulupale aya woomalela.

<sup>15</sup> Ahe, nyuwo mwarukunxaru elatarato ene *sa* khuweha, khino munooverya woona vamuthukumanoni, ti Kristu. Munnoona maitho Awe awehaka *nno*, voolikana ntoko sikhanleya okhalaka; owanre-ene eperuuka yootteela ya oMuluku Muulupale ni Mphuki a wirimu wothene ni vathi. Munniwerya woona maitho Awe, ephula, eyano Awe? [Muthukumano oniira, “Amen.”—Mol.] Murukunxele elatarato ene *sa*, ohiya enamuna awo yaarinaaya; epante *ela*, enamuna entthuneyaaya okhala. Ni nyuwo...Munniwerya woona? [“Amen.”] Owo ti Mphuki Muulupale. Khaavo hata mukina woohikhala Yoowo. Ni iwo osuwanyeihowi-tho wooloka voomalela, olipiheriwa wira Mutthak’ola ti Ekekhai. Ela Ekekhai. Eyo ekekhai. Ni omukhalihaka Owo kahi Mutthu aneeraru, masi Mutthu mmosa paahi!

<sup>16</sup> Ni yootteela, moone, munnoona oripela, wiitho Wawe, ireru Sawe, ni maitho Awe. Ni nwehe, Owo onweha...Mwa Yoowo onkhuma Waarya nno waaryelaka epante ya moono woolopwana, weiwo Owo onwehaawe. Ni vamwiikimanyi, ti vaavo Owo aawenhe-awe, moono woolopwana, vaavo Owo aamulevelenle-awe natampi. Mowaaryani wa ohihimuwa Wawe, hiyo nlelo ninnitthikela neettaka mwa Nsina Nawe.

<sup>17</sup> Kaanitthuna, voosiis u la, kaarina okathi munci-ene wira-wira kivirihe kilavulaka yookhumelela yeela ehinreere ovikana khula ohoverya, sinooniheriwaka mwa miyaakha miloko miraru sivinre, ahiiso miloko miraru ni mithanu, vaava va ekereja yeela; okhuma omurathini wu, okathi Waarya omosaru waakhurunwe-aya nno oJeffersonville, mwa 1933, khulavula moolomo awo, “Ntoko Yohani Mpatisa aarummwaly’awe wira ahoolele orwa woopacerya wa Kristu, Mutthaka anyu onoohoolela wa neeili.” Hiyo nri okathi wa wookiseryani, ni ninnoona. Hiyo imaara sikina ninnikoha xeeni ohimwarenyaya

mulaponi; khino okathi uwo ninookhalana okathi w'oleeliherya yeeyo, Muluku athtuna vale.

<sup>18</sup> Vano kintthuna wira mwaakhunle a—aBibilia anyu, ntoko hiyo kweekwe ninaamini-ahu wira Masu ahaana orwa toko, osommwa wa Masu. miyo okathi wothene kinnisoma Yaawo, okhala wira Awo...Masu aka ti masu a mutthu, awo anoovonya; masi Masu a Muluku khankhalakhala avonyaka.

<sup>19</sup> Vano ninrowa o—osoma mwa Soolempwa Soowaarya, yoosoma emosa. Ni nintthuna wira mukhunle, toko, mapuro mararu mBibiliani, kithanlale-aka osoma-mo. Nimosa naya nri mwa Wiisuupulula, kapiitulu 1, versiikulu 17 ni 18; ti vaavo Owo aakhumelen'yawe “Maihi awe ootteela ntoko manri a epwittipwitthi; nto inawu Sawe saari ntoko eporonse.” Vano nto kinthuna-tho wira murowele, mwa aBibilia anyu, aRooma 8:11. Miyo kithanlale, voosiis'ula, mapuro mararu wira kisome, mwa Soolempwa Soowaarya, wa Mutthaka aka olelo, Apwiya ahenlyaya vamurimani vaka mwaha wa ohihimuwa nno. Vano nto kinthuna wira mukhunle, nave-tho, Marku 16:1 ni 2. Vaavo kinookumiha yawaka—yoohimya aka.

<sup>20</sup> Vano mwa Wisuupulula 1:18, hiyo ninsoma Masu ala, 17 ni 18.

*Nto miyo vaamonale-aka, kaahimorela munawoni  
mwawe kinakhala kirimookhwa. Nto owo  
aahikiixaatherya ntata nawe noolopwana, onakileela  
wira, Muhoove; maana Miyo ka oopacerya ni ookiserya:*

*Miyo ka ole onkhala, ni kaahiiwiwa; nto, vano,  
kookhala voohimala-tho, Amen; ni kookhalana ihulelo  
sa mookhwaani ni omooroni.*

<sup>21</sup> Ni mwa aRooma kapiitulu 8 versiikulu 11, ninsoma so.

*Nave vakhala wira Erooho awe ole omuhihimunxe  
Yesu mwa'alipa-ookhwa enkhala mwa nyuwo, yoowo-  
tho omuhihimunxe Kristu m'walipa-ookhwa onooovah  
ekumi irutthu sanyu sinkhwa ni Erooho awe enkhala  
mwa nyuwo.*

<sup>22</sup> Nto vano mwa Marku kapiitulu 16, kapiitulu ya ohihimuwa, kapiitulu 16, versiikulu 1 ni 2.

*Nuumala ovira esaapatu, Maria a oMatala, maama...  
ni Maria mai awe Yakopo, ni Salome, yaahiruuha  
makhura oowunkhela, wira erowe Yamuttikitthele.*

*Nto oxaka-ene voosiisu nihiku noopacerya na  
esumana, awo yaahirowa omahiye nikhumaka nsuwa.*

<sup>23</sup> Vano, yoosoma aka voosiis'ula, kintthuna kikuxe mwaha wa yoosoma: *Ti Okhuma Wa Nsuwa*. Ni wa nisomi, kinthuna kirumeele, “Owerya woovaha ekumi.”

<sup>24</sup> Vano, moosuwela, khino nyuwo munnimwiiwaka raatiyu ni arumeyi ooziyana-hiyana olavula. Ni Munn'ihu Neville oottittimiheya voosiis'ula alavalaka mwaha wa Paasikha, mwaha wa ohiimuwa. Nto miyo kaahuupuwela wira khino kaamukuxa e—ephiro yoovirikana vakhani, kahi wira kikhale oovirikana, masi waacererya-tho vakhani, khino mpantte mukina, wa nyuwo. Soolempwa, khula mpantte onrowaanyu ni Soolempwa, kweekwe sinimuhimya Yesu Kristu. Khimukhanle okhumaka mwa yeeyo, mwa hata enamuna. Kweekwe sinimuhimya Yoowo.

<sup>25</sup> Vano, ntoko olumwenku olelo mwa mu—muteko wa muupuxeryo, wala, mano, Estadu Unidu ni epantte ela ya elapo ya vathi, voosiis'ula, mukereja ni mapuro othene, antthapela muupuxeryo wa—wa oxintta wuulupalex mutthu otonko awe okhalana.

<sup>26</sup> Miyo kinoona wira, ntoko Moopoli okathi Owo okhwiyaawe, wala ntoko mwanamwane okathi oyariwaawe, Owo khaakhanle okhalaka mu ehikanle wira aahirwa mulaponi. Nto okathi Owo okhwiyaawe, vekeekhai Owo ooliverya itampi sahu. Masi, nnakhala vo, aakhala anamwane anci-ene ooreera ayariwe, ni annikhala atthu anci-ene atonko ohaawa ni khukhwa mwaha wa niwoko n'ekekhai, masi khonakhaleke mmosa aawenrye ohiimuwa mpakha nihiku nla.

<sup>27</sup> Vano, okhalaka wira ela esumana yuulupalex mwa wahala, otthapela wuulupalex wa okathi wothene, Paasikha ola ti vatthu Owo oonihenryaaawe ethu Owo aahimmyaawe. Mutthu onoowerya ohimya itthu, masi nnakhala vo kahi etthu ekhanle waaminiwaka, voomalela, mpakha yooniheriwe okhala Ekekhai. Ni okhala wira ti Muluku, Ole iirale, "Nweheke itthu sothene; muthanleke sooreera," Owo khaarowa wooleelani wira mwiire ethu Owo ahaarowaawe wira Mmansawe. Tivo Owo aahooniherya wira Aari pani ola okhwenle itampi sahu.

<sup>28</sup> Nto, vano, kahi wira ti nihiku na muupuxeryo paahi, wa maluwa ala othene maalupale a Paasikha, ni ixapheyo sa Paasikha, ni anamarokolo a roosa, ni sikina, hiyo niikelin'haahumo, ethapelelo yoowaarya; yeeyo ekhanle saana, masi ela kehiyo etthu y'ekekhai mwa enamuna yeeyo.

<sup>29</sup> Ntoko atthu olelo antthunaaya ohimya wira, "Naahaana orapiha inawu emaara emosa khula mwaakha, na—Namaxexe, ni Namathanu naahaana waakhela ekomunyawu," ni miixuttiho sothene soohiyana-hiyana sa... Awo annivaanyihana khama naahaana okhala nihiku *nla* wala nihiku *nle*, wala khama naahaana okhala nihiku n'esaapatu wala nihiku noopacerya n'esumana; wala... Itthu iya sothene khasihiyo ethu woohikhala elimalelo paahi. Mureerelo xeeni saarowaaya okhala, wira munnimutthapela Kwareesima wala khamunimutthapela Kwareesima, ehikanle Ekumi mwa

nyuwo? Eyo eyuupuxeryo paahi. Yeeyo, ehikhanle hat'etthu ya nthowa ni yeeyo, masi awo vekeekhai arookhalihaxa ilimalelo saya, masi aroohiya etthu yootthuneyaxa.

<sup>30</sup> Satana khoncalo moota xeeni mukhanlyanyu natiini, wala moota xeeni mury'anyu naxariya Mmwiixuttihoni mwanyu. Mwavonyaru ophwanya Ekumi iyo, khamunrowa owela, mwa hata enamuina. Khivancala moota xeeni mukhanlyanyu natiini, oreera murima, ikereja kavi mwiirale-anyu mpantte wala munrowaanyu wira, khiyaavo hata emosa erina maana vahikhanle wira munoojariwa vasya.

<sup>31</sup> Tivo, vakhala wira Muluku oomuhihimuxa Yesu mw'alipa-ookhwa, Owo omuhihimuxenrye muupuxeryo paahi? Nto voosiis'ula wa ohihimuwa ti paahi ni-nihiku nimosa mwa eyaakha, wala nihiku nimosa nintthapelaahu yeela? Wala, hiyo ninnittottela muraarello ohihimuwa Wawe? Eyo enihimya exeeeni wa miyo? Eyo enihimya exeeeni wa nyuwo? Vano hiyo ninnaamini, mwaha wo waamini, wira Owo oohihimuwa mw'alipa-ookhwa, masi exeeeni erina naata ni miyo? Iyo saari iyaakha ikonto piili sivinre.

Vano wira kiphwanye yoosoma ela!

<sup>32</sup> Okhala wira kaahikhulumuwa, moono aka okiwereyaka, mwaha wa ixasawu nfurumeera okihomme-awe. Wira, kirowe ilapo s'okhopela vano, ntoko sinsuwelaanyu, muhina mwa mahiku vakhani, nto kaahaana okhalana ixasawu iya, mwan'aka ni miyo. Nto ni koolera, ettekuxa ya ncano, ni sothene, kaahikhulumuwa vakhani, saanikiwereya vakhani. Yeeyo, Kesari ontthunaawe wira mukhalaneke ixasawu iya muhinatthi orowa elapo ekina. Ni Owo ohimmye wira, "Munvaheke Kesari ele ekhanle ya Kesari, masi nto munvaheke Muluku ele ekhanle ya Muluku."

<sup>33</sup> Nto kikilaanthe-ene vaavo, kuupuwelaka etthu kaarowaaka ohimeerya muthukumano ola waalipelela voosiis'ula; yoowo onxukhurelaaka saana, ni alopwana n'athiyana yaarowa ovaha ekumi aya mwaha wa etthu mwaarowaanyu ohimya. "Kinrowa wira sayi? Kinrowa okuxa exeeeni ntoko yoosoma?"

<sup>34</sup> Vano nto kikilaanthe-ene vale, kihalelaka orupa, mukhora aka khunathukumela, ohoole wa empa. Khaavo aakhanle iwe woohikhala yoomi, mpakha vansuwelaaka. Miyo khwiwi. Nkiiwale saana. Nuuvira okathi vakhani, mukhora wa musaala, mwemmo onvolowaaka wira kisomeke, waanithukumela, ni aahikhala mutthu aattikinya mukhora. Nto miyo—miyo khuropa vamukhora khuhula mukhora, nto, otuthuwa waka, mwa—mwa—mwaaruusi, ooreera, a maihi a ncano, a maitho ooripelela eemenle vale, aakhala ntoko ethutu ekhaani ya Paasikha; okilaanthe va okiwehaka naanaano va.

<sup>35</sup> Owo khukinnya ettikitti. Nto yaari e... Vekeekhai, kinoona wira kaphiya owaani sinookhala ittikitti sa Paasikha, ni sikina;

masi ela yaari emosa, kaakhenlyaaka, kihikhanle owaani. Nto owo khwira, "Munna Branham, ela ti y'atithi aka ni miyo." Owo aathuna okupali wira "miyo" yaari mwa yeeyo. Nto atithi awe oowiipa makhonyokhonyo, ari-ene vakhaterani va iroota, yaarooveleeliha ettikitti ela. Vakuxale-aka ni kimuxukhuru mwanamwane owo, varukununwe-awe khukhuma vamukhora, miyo kitthukula ettikitti eyo.

<sup>36</sup> Nto ele yaari vattikittini yeela kikumin'haaka-vo yoosoma aka. Maana, vattikittini aari Marku Oowaarya 16:1 ni 2, okhuma nsuwa, nsuwa naamukhuma. Vano kaahuupuwela yeeyo, vano nto mwaha wa "ovahiwa ekumi," wa Yesu Kristu wira ahihimuxiwe mw'alipa-ookhwa, kikumiha mwah'aka.

<sup>37</sup> Vano, nsuwa, wookhumani wa nsuwa. Ahe, waahikhala okathi olumwenku waaryaaya mweepiphini yoomalela. Khiwaarina mukhalelo, ni khiwaakhanle etthu. Ni wothene waakhuneeliwe ni maasi, ni waaphwanyaneya vale mooriipela, wa muuttutthi, mukhalelo wa ewiriphi. Nto Erooho ya Muluku yaaniviravira vasulu va maasi ale, khwira, "Okhale okokola." Muluku aahikhala niwoko no wira yeeyo, okhala wira vathi va maasi ale yaari ipyo Owo aanle-awe, ni saanitthuna waarya iwo wa nsuwa wira sikhale sikumi.

<sup>38</sup> Nto Waarya woopacerya otonko ovahiwa elapo ya vathi yaari Masu a Muluku oolavuliwa. Waarya woopacerya otonko waaryela elapo yaari Masu a Muluku oolavuliwa. Owo iirale, "Okhale okokola," vano okokola waahikhala. Eyo yaahirukunxa epiphi khukhala waarya, wira ekumiherye yoopattuxiwa ya ohakalala ni ekumi elapo ya vathi. Vano, Erooho ya Muluku, okathi Eyo yaaviraviraaya ni ophenta ni omoriwa ikharari, ni nihiku nle nuulupale, nihiku noopacerya nooxa wa yoopattuxiwa elapo ya vathi; nsuwa naahikhuma khumwaleyia sothene, mirayi saya, khuumiha maasi a mulaponi, khupaka mukhalelo osulu. Nto, emaara aya yoopacerya, naari wira niruuhe ohakalala ni ekumi elapo ya vathi, mwaha wa epyo. Owo waari okathi muulupale.

<sup>39</sup> Masi, oh, khayaari etthu, okhuma iwo wa nsuwa, ntoko okhuma wa nsuwa voosiisu ule wa Paasikha. Okathi ula, ni nsuwa niwelaka osulu, nookumiherya okhuma wuulupale wa nsuwa nihinatoko aya; okhala wira saahirwa ihapari suulupale ni okhuma nno wa nsuwa, ovikana okhuma wa nsuwa wopaceryani. Okhuma nno wa nsuwa waahiruwa ihapari, wira, "Owo oohihimuwa! Owo oovahiwa ekumi okhuma mw'alipa-ookhwa, siiso Owo saalaihenryawe. Owo oohihimuwa mw'alipa-ookhwa."

<sup>40</sup> Emaara yoopacerya nsuwa nikhumme-aya, mwa Maphattuwelo, nlo naaruuha mutthaka wira yaamukhala ekumi elapo ya vathi, ekumi enookhwa.

<sup>41</sup> Masi okathi ula, okathi nsuwa nikhumme-aya, waari o—okhuma wa nsuwa vaili; nikina, Mwaana, akhumaka. Yaari e... kahi n-s-u-w-a paahi nikhumaka, aari M-w-a-a-n-a aakhumme wira aruuhele Ekumi Ehimala Epyo yothonene yoolaiheriwa ya Muluku yeeyo mwaha wo osuwela khalayi ene Owo oonne-awe wira yaari elapo ya vathi.

<sup>42</sup> Siiso ntoko e—ekumi ya miri yaahaaweryaaya okhala wu wopaceryani nihikhanle n-s-u-w-a wira niruuhele ekumi; siisotho, olelo, okathi aana a Muluku akhanlyayaaya elapo ya vathi, ontthunyea Waarya wa M-w-a-a-n-a wira waaruuhele Ekumi Ehimala, Ale oothanliwa Awe Owo aasuwenly'awe ohinatthi opattuxiwa olumwenku. Owo aahaathanla mwa Yoowo ohinatthi opattuxiwa olumwenku.

<sup>43</sup> Nto voosiisu wa Paasikha, nto, epantte emosa ya ethaya ela saaphwanyaneya irutthu sahu okathi ene yoowo, okhala wira hiyo na ethaya ya vathi. Nto Wirimu, yaahikhala Eliivuru ya muupuxeryo, ni mikhalelo Sawe saari mwa Yoowo, osuwelaka wira okhala wira Mwaana a Muluku ola aahiihimuwa, Ela yaammuhihimuxerya Ekumi khula mwaana aathomeliwe okathi ula muulupale. Owo aahisuwela wira yaamukhala siiso. Ni ovuwaxa xeeni wa okhuma nsuwa waari ole ovikana ole wopaceryani, okathi waapacenryaya oxa!

Vano, oxa nno wuulupale wa Ekanyeryo ya Paasikha!

<sup>44</sup> Vano, olelo nookhalana ekanyeryo ya Paasikha, a elapaha. Atthu anniveleeliheryana ihapari, mmosa ni mukhwaawe, ni wira ekhaliherye ekumiheryo ela yuulupale ya musurukhu wala ekampaanya, wira mameetiku ni siyensiya a mameetiku avarele muteko ethu, wira evukule wala ekhaliherye mwaha wa elapaha. Iyo ekanyeryo, ele eniithhanaahu ekanyeryo ya Paasikha, okathi onveleeliheryanaahu mutthaka mmosa ni mukhwaawe. Masi naakhelaka mutthaka, ekanyeryo eyo ti yootaphuliwa, okhala wira ekanyeryo t'ile erina mutthaka wootthukiwa muhina.

<sup>45</sup> Nto vano, Ekanyeryo y'ekeekhai ya Paasikha, ni okhuma nno wa nsuwa, yookheriwa; ni esiri y'Ekumi nuumala okhwa ehuupululiwa. Okathi owo ohinatthi, hiyo khinaasuwela. Olumwenku weetta mweepiphini, voohoona, waanyiherya wa mutthu. Iyuupuwelelo saari eriyari mmurimani mwa mutthu, ilimalelo saahipakiwa. Atthu yaakokhorela amuluku eethiru. Awo yaakokhorela nsuwa. Yaakokhorela inamuna sothene sa amuluku. Ni inamuna sothene sa atthu yaahimya itthu, awo othene amalenle mmahiye, ni akhanle mmahiye.

<sup>46</sup> Masi Ekanyeryo y'ekeekhai yaahitaphuliwa, nto Ole aatonko okhala ntoko hiyo sinkhalaahu, aakhwiye ntoko sinkhwaahu, khuhihimuwa mw'alipa—ookhwa. Voosiisu xeeni! Khonakhaleke omosa ntoko yoowo, mwa wahala othene a olumwenku. Esiiri yaahisuwelihwa wira Owo aari ohihimuwa ni Ekumi.

<sup>47</sup> Ni Owo iirale, okathi Owo ohihimunwe-awe voosiis'ule, "Okhala wira Miyo ka mukumi, nyuwo munookhala akumi nave." Kahi wira Owo t'okhanle paahi namattottela murareelo ohihimuwa, masi Epyo ele yothene yaamumula mwa natiri muulupale a Muluku yaari namattottela murareelo ohihimuwa iwo okela mw'Ekumini. Okhala wira, Owo ohimmye wira, "Okhala wira Miyo ka mukumi, nyuwo munookhala akumi nave." Iwo waari otaphuliwa wa Ekanyeryo. Okhala wira Owo aahiruuhiwa, siiso khula mmosa ori mwa Kristu onooruuhawa vamosa ni Yoowo.

<sup>48</sup> Mwa okhuma nno wa nsuwa woovuwa, Muluku aahooniherya, ahiiso olipiherya, Masu Awe. Epiphi yothene ni ohoverya waakenle mmuupuweloni mwa atthu wookumihawa, okhala wira va aari Ole aatonko okhala, olya, owurya, ni opatthana n'atthu, iirale, "Kihaana owerya w'ovaha ekumi Aka; kihaana owerya wo okuxa-tho." Nto vano kahi wira Owo aahimmye nuulumo nlo paahi, masi Owo aahooniherya wira yaari Ekeekhai. Oh, ethu xeeni yoovuwa ekhanle eyo!

<sup>49</sup> Miyo kookupali voosiis'ula wira hata hiyo, ninaamini, khaninwerya osuwela saana etthu xeeni yuulupale yaari iyo. Okhala wira Owo oohimuwa mw'alipa-ookhwa, hiyo-tho noohihuwa mw'alipa-ookhwa, maana hiyo naari mwa Yoowo.

<sup>50</sup> Nwehe vano. Epiphi yaakhuneela elapo, ni ipyo khisaakanle okhalaka n-s-u-w-a nihikhumme, ni epiphi yaahikhuneela elapo. Nto vano M-w-a-a-n-a aahihimuwa, epiphi yothene yaahilakaseihawa ni Waarya nno, okathi waamwareelaaya mulaponi, w'atthu, wira, "Owo khokhanle mu, masi Owo oohihuwa!" Nu—nuulumo xeeni! Owo aahooniherya Masu Awe. Owo aahooniherya wira Awo yaari, yaari ekeekhai, maana Owo vano aahixintta okhwa, omooroni, ni mahiye.

<sup>51</sup> Oraaru wa xetwani: okhwa, omooroni, ni mahiye; okhala wira Satana ti mwaneene okhwa, owo ti mwaneene omooroni, nave-tho mahiye. Ni owo waari oraaru wa Satana, okumiheriwaka ni ethu emosa, waari okhwa. Okhwa, munrowa mmahiye; ni muryeene natampi, munrowa omooroni. Yothene eryeene ethu emosa, oraaru wa Satana, yoovo waari okhwa. Waamukhalinhe mutthu mw'epothani miyaakha iya sothene.

<sup>52</sup> Masi vano oraaru w'ekeekhai wa Muluku, oryeene Ole woowooniheriwa mwa Kristu, Yoowo aari Ekumi, ni waataphunle Ikanyeryo khimuxintta nwanani, khuhihimuwa, Muluku mmosa ekeekhai ni mukumi. "Miyo ka Ole kaakhwiye, nto kinkhala voohimala-tho, ni kookhalana ihulelo sa mookhwaani ni omooroni." Muluku, akhalaka Mmosa, oowiipaka Mutthu, aahikhala ni hiyo, khimuxintta khula nwanani. Ni khooniherya wira oraaru wa Satana waahixinttiwa, ni wira oraaru wa Muluku waahisuwelihawa, okhala wira

Muluku paahi taarina owerya w'oruuh-a-tho Ekumi. Owo aari Emanuweli. Muluku aahisooniherya mw'erutthuni.

<sup>53</sup> Khivanxankiha Owo aawery'awe ohimya vale, Matewu kapiitulu 27, "Koovaliwa owerya wothene Wirimu ni vathi. Miyo kinoorumani okhala anamoona Aka, a olumwenku wothene." Owo aahixintta okhwa, omooroni, ni mahiye. Kahi wira Owo iirale yeeyo paahi; ni ookhuma, ooxintta, n'uweria wothene Wirimu ni vathi. Othene ale yaari Atithi, yothene yaari Erooho Yoowaarya, ni sothene sitonko okhala, saari mwa Yoowo. "Koovaliwa owerya wothene Wirimu ni vathi." Itthu sothene sikina khasirina owerya. Owo aahixintta.

<sup>54</sup> Vano! Vano nto, kahi yeeyo paahi, Owo aahiveleeliha Masu wa awiixutti Awe, waamini Wawe. "Muhoove, maana Miyo ka Ole kaakhwiye, nto kinkhala voohimala-tho. Ni kookhalana ihulelo sa mookhwaani ni omooroni; kooxintta. Muhoove-tho, okhala wira khula Epyo yookhalihwi khalayi ene yootthommwa ya Muluku enookela mw'E Kumini okathi Waarya iwe ommwareelaaya elapo yothene, wa Ehapari yooreera yoovuwa. Mwa khula okathi, Eyo enookumiherya ohepha Muluku otthokihenry'awe Yeeyo." Owo aahihihimuwa mw'alipa-ookhwa.

<sup>55</sup> Oh, moota ekhanly'aya ethtu yooreeraxa, "Miyo ka mukumi, wala koovaliwa ekumi." Nuulumo nnihimya, nuulumo *ovahiuva ekumi*, nuulumo n'Ekereku nnihimya wira ethtu "ekhalihwi ekumi numala okhwa."

<sup>56</sup> Ntoko e—epyō enkela mutthayani, ehaana okhwa, epyō yothene voomalela. Ehaana wuntta, epyō yothene voomalela. Ni ekumi yothene, yaari mw'epyoni, ehaana okhumela-tho.

<sup>57</sup> Owo aahivahiwa "ekumi." Kahi yeeyo paahi. "Ni kinoovaliha Ekumi yeeyo ekivanhe ekumi Miyo, Owerya okikuminhe Miyo mmahiye, kinimooveleliheryani Yeeyo nyuwo, wira yoovaheni ekumi, wira vankhalaaka nave-tho nyuwo mukhale vaavo."

<sup>58</sup> Mwa Luka, kapiitulu 24, versiikulu 49. Owo iirale, "Moone, Miyo kinimoorumihelani natiri a Atithi; masi nyuwo muhaleke, wala mulipeleleke, mpooma mwa oYerusalem, mpakha waakhela Owerya okhumaka Wirimu." Wira ooniherye wira kahi Yoowo paahi aaphwannye muraarelo wothene wa yeela, masi Owo ookawanya miraarelo iyo.

<sup>59</sup> Owo aarwenle ovuluxa, ahiiso oruuhela Ekumi, Epyo ele yootthommwa Muluku oonale-awe ohinatthi opattuxiwa olumwenku khuhela masina aya Muliivuruni mw'E Kumini. Nto va awo yaari mulaponi, ehirina nroromelo; Owo aarwenle kahi wira akhale Eparakha paahi, masi okawanya Eparakha ni Epyo yothene yootthommwa. Vano, Epyo yahaakhanle mulaponi, khivaaweryaneya okhala ekumi. Yaahaana okhala mulaponi, ni ophuwihiwa. Voohicala okathi xeeni

ekhalihawaaya mweepiphini, Eyo enoophuwa okathi M-w-a-a-n-a onaaryelaawe. Nwehe vano, Owo aarwenle okawana Yeeyo ni hiyo.

<sup>60</sup> Khivanxankiha Ehapari yooreera okhalaka mihupi sooreera. Nuulumo *Ehapari yooreera nnihimya* “mihupi sooreera.” Mihupi sooreera, exenei? Mutthu anikhwela vale, iyo mihupi sooreera. Vakhala wira Kristu ooyariwa iyo mihupi sooreera. Masi khasinakhaleke mihupi, khasinakhaleke mihupi ntoko mihupi iya, wira, Ole ommanne natiri oommaliherya natiri, wira, “Owo ookhala voohimala-tho, ni ookhalana ihulelo sa mookhwaani ni omooroni, mmatatani mw’Awe.” Epiphi yothene yaahimalihiwa. Khiyaakhanle-tho epiphi wira yooniwe, okhala wira Mwaana aahikhuma mmahiye. Khiyaakhanle, “Ahe, Owo onimoorwa, wala Owo khino onimoorwa.” Owo aahirwa, Ehapari yooreera, mihupi sooreera!

<sup>61</sup> Nwehe, Mutthaka ene wa Ehapari yooreera, Yoowo ene, ti owooniherya atthu wira Owo oohihimuwa. “Murowe mwaahimeerye awiixutti Aka wira Miyo koohihimuwa mw’alipa-ookhwa, ni kinookumana n’awo, wira kaalipiherye yeela.” O Muluku, moota nihiku nla nookiserya onrowaaya okhala-tho Waarya mulaponi mothene! “Nto Miyo kinoowooniherya awiixutti Aka! Murowe mwaahimeerye wira Miyo nkihiyo ookhwa, ni nkihiyo elimalelo, masi Miyo ka Kristu mukumi. Kinookumana ni yaawo. Mwaaroihelle Mutthak’ola awiixutti Aka, wira Miyo koohihimuwa mw’alipa-ookhwa,” Ehapari yooreera, mihupi sooreera.

Nyuwo muniira, “Eyo ekekhaii?”

<sup>62</sup> Aheperi 13:8 ahimme wira, “Owo mmosaru nsana, olelo, ni mahiku othene.” Hiyo, anamuttottela muraarelo Awe, nihaana wooniherya Ekumi Awe vano enkhala mwa hiyo, anamattottela muraarelo Ekumi yeela. Ekumi, khenakhaleke ekumi yookhaliwa ntoko yeeyo; Owo aari Mwaana a Muluku. Vano Owo khukhwa, nto ni yeeyo khuttipha; masi okathi Owo ohihimuwal’awe mw’alipa-ookhwa, voosiisu wa Paasikha, nto hiyo, ntoko arumeyi Awe, noorummwaa ni Yoowo wira nirowe mulaponi mothene ni nimuroihele ihapari iya sooreera khula mutthu, wira Owo mukumi. Ni ninwerya sayi hiyo wira ni Masu paahi? Maana yoolempwa, “Ehapari yooreera kherwiye ni Masu paahi, masi ni owerya ni wooniheriwa wa Erooho Yoowaarya, wira yooniherye wira Owo ookhala.”

<sup>63</sup> Vano, yaakkhanle-ene ehapari ekina, ntoko Paulo saahimenryaawe nimosa wa makhuru, “Nkireere otikinihiwa wira murukunuwenle ehapari ekina.” Vaavo vahikhanle ekina, masi ehapari epakeliwe, wa ehantisi ya muromolelo, muhiyaka mihupi sooreera.

<sup>64</sup> “Nto okhala wira miyo ka mukumi, nyuwo munookhala akumi nave. Ni Miyo kinkhala mwa nyuwo, ni miteko

Miyo sinvaraaka,” Yohani 14:12, “miteko Miyo sinvaraaka sinookisuwanyeihia Miyo mwa nyuwo.” Mutthaka xeeni! Khivanxankiha, sinkhalanakaahu olumwenku w’epiphi wa teyoloxiyya, masi okathi wa makaaripi onimoorwa-tho Warya. Onookhala ohihimuwa okathi wa makaaripi. Onookhala Waarya okathi wa makaaripi.

<sup>65</sup> Vano, ekhalelo ene ya Mutthaka oveleelihiwe, wira, “Owo oohihimuwa mw’alipa-ookhwa,” hiyo anamattottela muraarello Awe, hiyo ninkawana ohihimuwa ni Yoowo, ninkumiha muraarello mwa yeela, nooniheryaka olumwenku wira Owo mukumii. Khanikhanle wiiraaka ni moolumo paahi. Khanikhanle wiiraka ni elimalelo ya mutthu. Hiyo ninooniherya vekeekhai ele ninthoonyaahu.

<sup>66</sup> Kinnoova olelo wira anci-ene a hiyo khanweettiherya athu wa Kristu. Ninweettiherya okereja, eyuuupuweleno. Masi nihaana oweettiherya wa Kristu. Owo ti Mmosa paahi, ni Mmosa paahi orina Ekumi. “Ole orina Mwaana ookhalana Ekumi.”

<sup>67</sup> Nto ekumi ya mutthu okhwkiye yooniheriwaka mwa nyuwo, munookhala ekumi emosaru owo aakhalaawe.

<sup>68</sup> Ephome ya mutthu yaari mukhalelo khata wa ephome, vano nyuwo khukuxa ephome ya mutthu mmosa khurukunxa ephome ya mutthu uwo mwa ekina, owo ttiri aamukhala a mukhalelo yoole wa ephome.

<sup>69</sup> Ni erooho eri mwa nyuwo yasuweiwa ntoko yookhwa, nto nyuwo khuttikittheliwa ni Ekumi yaari mwa Kristu, khunakhala mwa nyuwo! Arooma 8:11 ahimmye wira, “Vakhala wira Erooho emuhihimunxe Kristu mw’alipa-ookhwa, enkhala mwa nyuwo, Eyo enoovaha ekumi erutthu anyu enkhwa,” Ekumi emosaru yeeyo, owerya omosaru, ni miraarello imosaru, Owo aarinaawe mulaponi muumu, sookhuma wa Muluku. Owo ohoovuluxani, Epyo yaasuweliwe khalayi ene ni Muluku, ale masina aya aheliwe Muliivuruni mw’Ekumi ya Mwaapwittipwitthi ohinatthi opattuxiwa olumwenku.

<sup>70</sup> Nto Waarya iwe wa Ehapari yooreera ya ohihimuwa, olipiheriwa wa Masu! Ninsuwela sayi wira Owo aari Kristu? Okhala wira Owo aahooniherya ethu Owo aahimme-awe. Kinrowa osuwela sayi Mutthaka w’okathi? Muluku onnooniherya ethu Owo aahimaly’awe, ni Owo onnilavula yeeyo. Iwo p’usuwanyeihia, wira hiyo n’anamattottela muraarello ni Yoowo woohihimuwan. Owo onnooniherya ethu Owo ohimme-awe.

<sup>71</sup> Etthu Owo aahimaly’awe wira mwa Kristu, Owo aahooniherya woohihimuwan. Etthu Owo aalaihenryawe wira mahiku a Moise, Owo aahooniherya. Etthu Owo aalaihenryawe mahiku a Enookhi, Owo aahooniherya. Mahiku othene a arummwa, Owo aahooniherya eyo.

<sup>72</sup> Vano nihiku *nla*, Owo onnooniherya ele Owo ohimmye-awe, okhala wira awo epantte ya Epyo ele yaathoonyeriwe Muliivuruni mw'Ekumi wira Owo aarwenle ovuluxa-tho otthikela wa Muluku. Oh, Mutthaka xeeni!

<sup>73</sup> Voosiisu wa Paasikha, kahi wira aahihimunwe Yoowo paahi, anamuttottela muraarelo Awe yaahihimuwa ni Yoowo. Owo... Awo yaari mwa Kristu wookhomeliwani Wawe vamwiikimanyo. Awo yaari mwa Yoowo woohihimuwanu Wawe. Hiyo n'anamuttottela muraarelo Awe, oovahiwa ekumi nimanlene okhwa mweepiphini.

<sup>74</sup> Olumwenku wa epiphi wo ohaamini, mwemmo ikereja ni miromolelo, ni sikina, saanikhallannaya-mo. Ni yookhala ethu mwa hiyo eniitthana, "Oh, hiyo nimmuthuna Muluku! Hiyo ninvoliwa etala ni ntthona mwaha wa Muluku." Hiyo naaitakanxa ni aMetotista, aPatista, aPentekosite, maPrespiteriyaano, n'akina-tho, ni nlelo yaahikhala ethu yoovonyeya, hiyo tthiri khinaawerya ophwanya Eyo nlelo. Nto naanaanoru, okathi waapapelaahu mweepiphini, ohihimuwa wuulupale khunirweela mwa wooniheriwa wa Masu oolaiheriwa a Muluku.

<sup>75</sup> Ntoko, Owo aari wooniheriwa wa Masu oolaiheriwa a Muluku. "Miyo nkinihiya munepa Awe mookhwaani, nnakhala nkinimuhiya Oowaarya Aka wuntta." Owo aahooniherya Eyo, khula Masu a Muluku aalaiheriwe Yoowo. Owo aahooniherya okathi ohihimunwe-awe voosiisu wa Paasikha.

<sup>76</sup> Vano, ale yaatonko waapapela mweepiphini ni ehisuwelaka, vakhala wira yaahaana orapiha inawu nihiku *nla*, wala vakhala wira yaahaana osuka nihiku khata, wala otthara sooruma khata, itthu iyo sothene soovira. Tthiri, waahikhala ohihimuwa woovuwa ovirikannye khula ethu yoopakiwa ni mutthu otonko awe wira, waanyiherya wothene woopakiwa ni mutthu.

<sup>77</sup> Khaatonko okhala, mpakha okathi yoovo, mutthu aawerya ovaha ekumi awe ni okuxa-tho. Owo ooxira eyooniheryo ele ya siyensiya awo yaarinaaya, mwaha wo ohihimuwa.

<sup>78</sup> Awo yaairaka, wira, "Yesu Kristu kahiyo mmosaru nsana, olelo, ni mahiku othene," wira, "Owerya Wawe kuhiyo omosaru," wira, "Ehapari awe kehiyo emosaru," okathi Bibilia onihimyaawe wira Eyo emosaru! Muluku ooxira khula muromolelo, khula eyaaminelo, vano Owo ookelela oholo ni Erooho Yoowaarya Awe, ntoko Owo saahimme-awe, ni oonooniherya, wira Owo mukumii.

<sup>79</sup> Hiyo n'anamattottela muraarelo ohihimuwa Wawe, nivahiwe ekumi nimanle-ene okhwa molumwenkuni, mutampini ni sootakhala. "Owo oonivaha ekumi vamosa ni Yoowo, anihihimuxaka ni Yoowo, vano nikilaanthi mapuro a Wirimu mwa Kristu Yesu." Owo oniruuha...

<sup>80</sup> Erooho Awe enniruuha-tho Ekumi Awe yeeyo elapo ya vathi. "Erooho ya Muluku, emuhihimunxe Kristu," erutthu, erutthu yoottikittheliwa; vakhala wira Erooho ya Muluku yaahitikitthela erutthu ele mwa enamuna emosa wira, okathi Epyo eyo emorenlyaya mulaponi, Owo khaarowa omuhija omumula iwe. Nnari. Owo aahinvaha ekumi ni khimuhihimuxa. "Erooho emosaru yeeyo," ni miteko imosaru, ni Owerya omosaru, ni ithoonyeryo imosaru, "yakhala-ru mwa nyuwo, Eyo enimoohihimuxani nave-tho."

<sup>81</sup> Kaatthuna koosomeleni Yoolempwa yaamukhaani va. Kaatthuna wira mukhunle Yoolempwa ekina kilempe aka va. Pooti wookhaliheryani vakhani. Emphwanyaneya Muliivuruni mwa Onamukuttho, kapiitulu 23, versiikulu 9 mpakha 11. Nwiriyane saana. Mwa ikano, ikano sa aLevi, Muluku alavulaka ni Moise. Nwiriyane. Itthu iya sothene ithoonyeryo vano, ni ninrowa omalela vaava okathi vakhani wira nikelé mwa ethoonyeryo ela.

*Vano APWIYA yaahimuleela Moise, yiiraka,*

*Mwaahimeerye aana a Isarayeli, mwiire, nyuwo...  
mwaphiya elapo kinoovahaakani,...*

<sup>82</sup> "Nipuro, voopuroni, koovanhe-akan. Vano mwaaleele aana a Isarayeli, wira mwaphiya nipuro nla khata miyo koolaihenry'akan wira kaamooroihani, nyuwo mwaphiyaru iwe muttetthe yoola." Vano olavula veephattu va, ethoonyeryaka ya erooho.

*...okathi wo ohepha ipyo sanyu (mwaakhenle koohimenryaakani), vano nyuwo mmuroiheleke namukuttho ehupu yoopacerya ya soohepha sanyu:*

*Nto owo onooahakhinya ehupu eyo oholo w'APWIYA  
wira mwaakheliwe nihiku nootharana nuuvira  
Esaapatu namukuttho onooahakhinya.*

<sup>83</sup> Naakhanle niira noowaarya, naahaana opakiwa nihiku na esabath, nenlo naari nihiku na neethanu nenli na esumana, nenlo nikhanle Saapatu. Masi nyuwo moowehe, mwa muupuxeryo ola, yaahaana ohakhinyiwa nihiku noopacerya na esumana?

<sup>84</sup> "Ehupu, yaari mulipu wa epyo mwaanle-anyu, okathi emmelaaya khuttokottha, mwaahaana othikila ehupu ela khuroiha wa namukuttho. Ni omutthuniherya owo okuxa ni ohakhinya oholo w'Apwiya, wira mwaakheliwe, wira muhaakheliwa. Muhoorwa ni ehupu anyu, nto owo ohaana ohakhinya oholo w'Apwiya, o..."

<sup>85</sup> Kahi saapatu, nihiku na neethanu neeili; masi nihiku noopacerya, hiyo niniihanaahu Ttiminku, T-t-i-m-i-n-k-u.

<sup>86</sup> Vekekhai, nlo nu—nuulomo na Erooma, nenlo awo yiihanakaaya nihiku na nsuwa wa muluku a nsuwa. Masi moota erukununwe-aya!

<sup>87</sup> Khanihiyotho n-s-u-w-a. Ti n-i-h-i-k-u na M-w-a-a-n-a, nihiku na Mwaana, nenlo enuku ele ya Etriku (oopacerya a Muluku okhumme mw'alipa-ookhwa) ohaana ohakhinyeriwa muthukumano, wira hiyo na Epyo Awe; ni eyo ti yoopacerya ya Epyo y'ale arumpe, enihakhinyiwa nihiku noopacerya na esumana. Ttiminku, Owo aahihimuwa. Khulaiha khuwela Wirimu, ohoolo w'atthu.

<sup>88</sup> Nwehe, Yaari enuku yoopacerya ya Etriku ya Muluku yaahihimuxiwe mw'alipa-ookhwa, enuku yoopacerya ya Etriku ya Muluku. Ni Owerya woovaha ekumi wa Muluku, Muluku aahivaha ekumi ekumi Awe, khumuhihimuxa mw'alipa-ookhwa, nto Owo aari Mulipu w'ale yaarupa, Mulipu. Owo aari Ehupu.

<sup>89</sup> Mwaha wa yeeyo awo yaarinaaya ohakhinyaka ehupu, okhala wira yaari yoopacerya ottokottha. Ni yaahakhinyiwe ntoko ethapelo ya omuxukhuru Muluku, yaaminiki wira akinaaya yaanvenya. Yaari ethoonyeryo.

<sup>90</sup> Ni, olelo, okhala wira Owo aari Mwaana oopacerya a Muluku oophiyerya ottokottha voomalela, wira akhale mwa Muluku, Owo ookumihiwa elapo ya vathi wira ahakhinyeriwe atthu othene. Oh, nisomi xeeni noovuwa! Ni Owerya woovaha ekumi, Oopacerya! Onamwi, Owo aarina—Owo aathoonyeriwe; ni imaara sinci-ene, ntoko sinrowaaahu woona ohoolo, wira Owo aahithoonyeriwa. Masi ola waari Mulipu w'ale yaarupa. Owo aahihakhinyeriwa Epyo yoolaiheriwa yaarina natiri a Ekumi.

<sup>91</sup> Owo aahihakhinyiwa Nihiku na Pentekosite, “waarwiiye-aya nsu okhuma Wirimu ntoko ettheku, yoonyakula enoopa ni ikuru,” ni khuhakhinyeriwa atthu, atthu apentekosite yaari vale oPentekositeni, yaalipelela Eparakha orwa.

<sup>92</sup> Ni wira ohakhinyiwe-tho, ntoko sinsuwelaahu, nihiku nookiserya, voolikana ni Luka 17:30, nihiku na Mwaana emaara ekina, “nihiku na M-w-a-a-n-a a mutthu onrowaaawe wooniheriwa,” wala ohakhinyeriwa-tho atthu.

<sup>93</sup> Vano, taani okhanle Mwaana a mutthu? “Wopaceryani naari Nsu, nto Nsu naari ni Muluku, nto Nsu naari Muluku. Vano Nsu niihipaka erutthu, khukhala ni hiyo.” Nto vakhala wira mwiixuttiho wothene orinaahu, ni olipiheriwa wa Masu a Muluku; ni Masu a Muluku, ni ithoonyeryo, ni mitikiniho, hiyo ninnona olelo, wira Muliivuruni mwa—mwa Luka va, nimanlyahu ohimya, ahiiso lu—Luka kapiitulu 17 ni versiikulu 30; ni Malakhiya 4, ni Soolempwa soohiyana-hiyana hiyo ninsuwelaahu, wira Masu yaawo-tho annihakhinyeriwa atthu, wira ilimalelo sookhwa sa mutthu sihookhwa, ni Mwaana a Muluku mukumi-tho ni opatiiso wa Erooho Yoowaarya eriyari ahu, ni ennivaha Ekumi.

<sup>94</sup> Siiso ntoko Kristu aaryaawe Ole oopacerya ohihimuwa, mwa maprefeta othene, ni akina; onaamwi ooothoonyeriwa mapuro manci-ene, Owo aari Mulipu w'ale arumpe. Mwa

Mwaakameliwa, akhumaka mwa Kristu, onkhuma mukereja, ehaana okhala Ehupu enihakhinyiwa-tho mahiku ookiserya. Oh, wulu!

<sup>95</sup> Ohakhinyiwa wa ehupu! Exeeni yaari ehupu? Ele yoopacerya ottokottha, ele epacenrye wooniherya wira yaari etriku, yoonihenrye wira yaari ehupu.

<sup>96</sup> Aleluya! Kookupali wira munnoona enihimyaaka. Eyo yaahakhinyeriwa atthu. Nto emaara yoopacerya enrowaaya okhala, wa okathi wa Mwaakameliwa, wa ohihimuwa okhuma mmiromoleloni sa epiphi, onrowa okhala Mutthaka, yoowo ottokottha woomalela wa Masu otthinke-aya mwa Owerya Waya woomalela, ni onrowa ohakhinyeriwa atthu, ni ithoonyeryo imosaru ni mitikiniho Owo opakale-awe wu.

<sup>97</sup> “Okhala wira Miyo ka mukumi, nave-tho nyuwo munookhala akumi,” alavulaka ni Mwaar’awe. “Okhala wira miyo ka mukumi, nyuwo munookhala akumi.” Ohihimuwa xeeni waari uwo! Ni ohihimuwa xeeni okhanle ola, ohihimuxiwa mw’alipa-ookhwa, “wira nikhalihewe akumi mwa Kristu Yesu,” ni Owerya woovaha ekumi wa Muluku!

<sup>98</sup> Owo aahikhinyiwa oholo waya. Masu, yaawo Owo aary’awe, yaahikhinyeriwa awo Nihiku na Pentekosite, Masu owooniheriwa. Vano, nto ntoko sihimme-aka, anoohakhinyiwa-tho nihiku nookiserya. Vano, mwa nlikanyiho . . .

<sup>99</sup> Nyuwo muniira, “Ahe, vano, nwehererye minuutu mmosa, Munna Branham. Kinnisuwela ekereja e . . .” Ahe, ni miyo, nave. Munnona?

<sup>100</sup> Masi vano, mwa nlikanyiho, ankhi—vaakhanle wira naarowa otthikela oTucson oxekuw’ola, vano, ni khula mmosa a hiyo aarina e . . . aarowa ovolowa mu—muCadillac muulupale, musya? Ni ikhatera sothene saapakiwe ni—ni esapala, esapala yoowoolowasa, yoowoolowa ni yookhweya okilaathi-vo; ni moonyakela waari mooreeraxa; eleemi yaari yookhuneeliwa ni niikeli ni yoowarihiwa tiyamante yothene; ni mutooro aya waari wo weehereriwa ni mekaaniku wira okhale mutooro woolikana; ni iroota saari . . . sothene sa rolamento ni soowoottihawa makhura; ni ipenewu saari soohittyuuwa ni soohiphutuwa; ni sothene sooweehereriwa mwa siyensiya.

<sup>101</sup> Saakhanle wira saammala-ru okhuma mwaapakiwaaya, soopiili, ni soopiili soosarya kasoliina. Iyo ikuru so weettiha, kasoliina, okhala wira mwemmo ori-mo oktaano. Masi vano mwaarowaka opattiha, sinaamwi soopiili sikhalaaka ntoko soolikana, masi khukhala emosa aya ehirina ephaniphani, ehirina owerya wo opatta.

<sup>102</sup> “Ahe,” nyuwo muniira, “owerya ori mukasoliinani, Munna Branham.” Masi miyo nkincala owerya kavi ori mukasoliinani; voohikhala wira enookhala ephaniphani vo wira yooniherye owerya iwo, voohikhala wira wookhala owerya

vo wira olipiherye wira owo kasoliina, yaamulikana ni maasi. Mpakha . . .

<sup>103</sup> Hata wira mateyooloku anlavula sayi, oratta xeeni ekereja anyu ekhalihwaaya, osoma kavi orinaanyu, hata enlikana sayi ni Bibilia; mpakha Ehupu iyo yoohakhinyiwa, mpakha Erooho Yoowarya erwe mwa mutthu owo evahe ekumi Masu awo! Kasoliina onthoonyerya Masu. Eyo Ekeekhaii; masi, ahirina Erooho, Awo khaneetta.

<sup>104</sup> Hiyo ninoohelaxa elemelelo mwa Mekaanika nave hat'etthu mwa Eyeettiheryo. Onthuneya Owerya wa eyeettiheryo wa Muluku, Owerya wa ohihimuwa wa Yesu Kristu vasulu va Ekereja, wira yooniherye ni wiiraneiha wira *Ola* kasoliina. Pooti okhalaka mulaathani mwa kasoliina; nlelo vaamuweryaneyea okhala maasi, moone. Masi mooniheryo mmosa paahi, t'ula, ohelela Ekumi ila mwa yeeyo, nto onimooniherya sinto kasoliina wala nnari.

<sup>105</sup> Ni nyuwo mweereryaka ohela Erooho Yoowaarya mmuromoleloni, enoolikana ni weererya . . . Pooti okhalana opuphuruwa; munohonona mutooro anyu, mwaha wo osariha makhala.

<sup>106</sup> Masi, oh, kinnitteeliwa murima okhala wira wookhala Owerya wa oktaano ikonto muloko, Masu a Muluku ni Erooho Yoowaarya wira epattihe, ni ohihimuxa Owerya wa Muluku mw'ekumini mwa mulopwana, wala mw'ekumini mwa muthiyana, wala mukereja. Eyo emusukhumenle Cadillac ole mphironi, vathi va Owerya wa eyeettiheryo wa Eooho Yoowaarya etthinke khuhakhinyeriwa atthu Nihiku na Pentekosite, emukhalihaka Owo mmosaru nsana, olelo, ni mahiku othene.

<sup>107</sup> Vale yaari Ehupu yoopacerya yaakhumme mwa maprefeta othene, yoowo aari Mwaana a Muluku, Mwene a maprefeta othene.

<sup>108</sup> Sinnikhala, ikereja, ikereja, amwaakameliwa, amwaakameliwa, ikereja, amwaakameliwa, amwaakameliwa.

<sup>109</sup> Masi ohaana okhumelela Mmosa! Aleluya! Ohaana okhumelela Mwaakameliwa eekeekhai! Ohaana okhumelela Mmosa ohirina Mekaanika paahi, masi Eyeettiheryo ya Yeeyo, enikhaliha Ekereja ekumi, eneetta mwa Owerya w'ohihimuwa Wawe. Nihiphienrye nippuro nenlo, nihiphwannye nippuro nenlo, eniphwanyihani yooreera okuttha ikuupu? Eniphwanyihani yooreera orukunxa mukhalelo wala omukuttha voomalela ehikhanle Eyeettiheryo mwa yeeyo? Khivancala moota xeeni Mekaanika enooniheryaya okhala yoolikana, ehaana okhala Eyeettiheryo wira evarihe muteko.

<sup>110</sup> Ti yeeyo Owo oonihenryaaawe! Aleluya! Ti yeeyo Paasikha oonihenryaaawe. Owo khaari Masu paahi, masi Owo aari Muluku Mwaneene, Eyeettiheryo, mwa Masu. Yaairinhe erutthu ya

Yesu Kristu (yooriirya, yoolipa, ni yookhwa, mmahiye) wiitatha ekelaka mw'Ekumini khuhihimuwa, ni khupirikixa nluku. "Miyo ka Ole kaakhwiye," ookhwaxa mpakha nsuwa ohimya wira Owo aahikhwa, mweeri ohimya wira Owo aahikhwa, ittheneeri ohimya wira Owo aahikhwa. Ephattu yothene yaahihimya wira Owo aahikhwa. Nto vano olumwenku wothene ohaana osuwela wira Owo mukumi-tho. Owo khaari Mekaanika paahi, Masu a Muluku, Owo aari Eyeettiheryo wira ooniherye.

<sup>111</sup> Nto Owo, oryeene Mutheli, Mwaakameliwa ohaana okhumelela, okhala wira Owo epantte ya Yoowo. Ni enweryaneyea okhala paahi wooniheriwa wo omaliheriwa wa miyuupululo sothene ni sikina silavuliwe sa Mwaakameliwa; Enwerya wooniherya paahi. Yaairaka ethtu yoovirikana ni Mutheli, owo kahi Mwaakameliwa. Okhala wira, Owo erutthu ya erutthu Awe, nikhuva na nikhuva Nawe; Ekumi ya Ekumi Awe, Owerya wa Owerya Wawe! Owo ti Yoowo! Ntoko mulopwana ni muthiyana ankhala mmosaru, ni muthiyana okumihewe-ene mpararini mw'awe, Owo aahikuxa Erooho, Erooho y'othiyana, mwa Yoowo. Erutthu mpararini mw'Awe, yoopaka Mekaanika ni Eyeettiheryo, Mwaara. Erooho ya Yoowo ni erutthu ya Yoowo, khuhela vamosa, khupaka Mekaanika ni Eyeettiheryo. Mpakha ekereja wala athtu . . .

<sup>112</sup> Anamarokolo ala othene a Paasikha, ni meera, ni ikereja suulupale, ni ereeriho, sinoopweteya ni sihikhale.

<sup>113</sup> Mpakha Ekereja eyo ekhale Eyeettiheryo ni Mekaanika; ni Erooho ya Muluku, yaamweettinhe Owo, wira iire ithu Owo siiraly'awe! Vakhala wira Owo ovanre muteko ni isilinturu muloko ni thanu na mosa, siiso-tho Mwaakameliwa onimwiira. Amen! Maana Owo oohimya, mwa Yohani 14:12, "Ole onikaamini Miyo, miteko sinvaraaka nave-tho owo onoovara. Miyo kinoonvaha ikuru sa Eyeettiheryo Aka, Mmekaanikani mwawe, olumwenku ohinrowaaya owerya ovirikanya; ni kinoomuhimuxa nihiku nookiserya." Owo ti Mutthaka wa Paasikha, Eyeettiheryo ni Mekaanika, vamosa! Mekaanika ehikhalanne Eyeettiheryo, khiveethu; nnakhala Eyeettiheryo, ehikhalanne Mekaanika.

<sup>114</sup> Munooewerya okhuvwela n'unyakula, n'utupha osulu ni vathi, sothene munthunaanyu, n'ukhootta Masu ala, khenrowa ophwanyiha ethtu yooreera. Nyuwo munttikinya paahi i-ipistawu sa . . . Yookhala ephaniphani vale wira epattihe, masi khokhanle kasoliina wira epattihe-no.

<sup>115</sup> Enrowa ovara muteko paahi okathi iyo sinkhalaaya vamosa. Amen! Tivo, mmosa onoohala, nto Mmosa onoowela. Eyo t'ithu emosa paahi ekhanle wa yeeyo. Nnakhala vo, soopiili pooti okhala soolikana, soopiili sinihimya okhala ikereja, soopiili sinihimya okhala Mwaakameliwa. Masi Mmosa

orina Mekaanika *ni* Eyeettiheryo, Ennikhumeleliha, ele Owo ohimaly'awe okhala Ekeekhai.

<sup>116</sup> Khenrowa weetta tu, hata wira Mekaanika ereerale sayi, mpakha Eyeettiheryo orwa. Eyeettiheryo yarwa vale, Mooroo owo onookumana ni oktaano ole mukasoliinani. Nto eyo yaphutuwa, enkumiherya epahayelo, nto opaheya iwo onsukhuma khula mweettelo, khula nivalo, maana Owo mmosaru nsana, olelo, ni mahiku othene. Iwo ohimiuwa. Iwo Owerya w'ekekhai wa Muluku, Mekaanika *ni* Eyeettiheryo. Nwehe, "Eyo Erooho envaha ekumi." Ti—ti Ephaniaphani empatta. Kahi kasoliina ompatta; ti Ephaniaphani enimpaattiha kasoliina. Munnona?

<sup>117</sup> "Khiivo enweryaanyu wira muhikhanle mwa Miyo; masi ni Miyo nyuwo munooowerya wira itthu sothene." Siiso Owo sikhanlyawe Masu, t'Atithi ankhala. "Atithi aakiruma, Miyo kinimooruman. Siiso Atithi akipattinhe-aya Miyo ni okisukhumela mwa itthu sothene, kiniira paahi ele emmusivela Muluku. Vano, siiso Awo akiruume-aya, miyo kinimooruman ni Mekaanika emosaru, ni enthunyea Eyeettiheryo emosaru wira evarieh muteko. Nto ithoonyeryo iya sinimwaathara ale anihimya okhalana Mekaanika. Eyeettiheryo enookhala voopuron Vaya."

<sup>118</sup> Paulo ohimmye wira, "Ehapari yooreera enirweenle kahi mwa Masu paahi," ni kasoliina paahi, "masi ni Ephaniaphani nave," wira yeettiheke. Eyo vo. Eyo erwiiye wa hiyo enamuna yeeyo.

<sup>119</sup> Eyo Erooho emosaru, yaamuhihimunxe Owo, envanhe ekumi mulipa-owamini eekekhai okela mw'Ekumi Ehinalima. Vano muupuwele, vooweryaneya... Vano nwehe, okhala wira okathi ahu onoonimalela. Nwehe, "Erooho emosaru," vano, aRooma 8:1. Vano nrowe nisome-tho yeeyo, mwa aRooma 8:1, nto ninimoona etthu enihimy'aya. Vaareera. Ni kahi aRooma...kinihimya, 8:11, kileveleliwe.

<sup>120</sup> Mwa aRooma 8:11, "Masi *vakhala* . . ." Vo ti vari mulattu. Vo ti vari mwaha Awe.

*Nave vakhala wira Erooho awe ole* (Muluku, Erooho Yoowaarya) *omuhihimunxe Yesu mu'alipa-ookhwa enkhala mwa nyuwo*, . . .

<sup>121</sup> Vano, eyo eri vo, "Erooho ya Mutheli yaakkhalaka mwa Mwaakameliwa!"

<sup>122</sup> Okathi Muluku ompanke-awe mutheli Awe oopacerya, Owo aapacenrye ompaka mutheli, ni owo aari soopiili mulopwana ni muthiyana, mwa erooho; aampanke vatthayani va elapo ya vathi, wira akhale mwa erutthu. Ni nwehe okathi Owo ompanke-awe Hawa, okhuma mwa Atamu, Owo khaakunxe epantte ekina y'oloko, Owo aakunxe nipattuuxa nimosaru na oloko; Masu mamosaru, maana Atamu aari Nsu noolavuliwa. Munnona? Owo aakunxe mwa yoowo, vano nto khukuxa e... Owo aarina

erooho y'olopwana ni y'othiyana. Nto Owo aakuminhe erooho y'othiyana mwa Atamu, khuhela mwa Hawa; tivo eyo nlelo epantte ya erooho ya Atamu, eyo erutthu ya Atamu. Vano, yaari erooho ya Atamu, eyeettiheryo, yaavanhe ekumi mekaanika ya erutthu awe.

<sup>123</sup> Tivo Mwaakameliwa ohaana okhala erutthu ya erutthu Awe, ni nikhuva na nikhuva Nawe. Vano erutthu ila enkhwa enrowa okhala sayi erutthu Awe? Ninoophiyerya yeeyo mwa minuutu mmosa, moone. Eniiriwa sayi? Sayi? Exeeni erukunxelo ela yuulupale? Nwehe.

*Vano vakhala wira Erooho awe ole (Muluku) omuhihimunxe Yesu mu'alipa-oookhwa enkhala mwa nyuwo, yoowo-tho omuhihimunxe Kristu mu'alipa-oookhwa onoovalaha ekumi irutthu sanyu sinkhwa mwaha wa Erooho awe enkhala mwa nyuwo.*

<sup>124</sup> Oh, wulu! Ale oothommwa, vekeekhai, ntoko Epyo yaaheliwe vatthayani, Ole aarina Ekumi mwa yaawo. Sinciene saahikhwa; iyo saari epyo yowunnta; maasi ni itthu sikina saahipaha. Masi, moosuwela, yaahikhala Epyo yaaphwanyaneyea vale yoolikana wira yaakhele Ekumi. Muluku aahisuwela wira Eyo yaari vaavale.

<sup>125</sup> Vano, Ale oothommwa t'ampacerya ovahiwa ekumi ni Erooho Yoowaarya, okhala wira Erooho Yoowaarya enrweela okuxa ele Yawaya. Vano, ela ti yoowiixa vano, ni mukupali wira munoovara saana.

<sup>126</sup> Vano, okathi nsuwa niveleelihiwaaya elapo yothene, kahi wira niruuhele, ekumi myala, seiyo saari ethhaya nave, khinaari wira niruuhele ekumi ethhaya yothene, masi naari wira niruuhele ekumi epantte ya ethhaya yaavitha ekumi.

<sup>127</sup> Kahi atthu othene arrowa omwaakhela Kristu. Oh, nnari. Masi ale Muluku aatthomenle-awe Ekumi, arina empa aya mutthayani mwa elapo, Ala ti Yaawo Owo onrwaaweha waavaha ekumi. Ti Yaawo.

<sup>128</sup> Wira, vano, ethhaya eyo enrowa okhala vansuwani vaavale, ni wira, "Oh, nsuwa nla khanireere oviha!" Mwala owo, onimwiira, "Nsuwa nla khanireere oviha!" Masi epyo ele yaamukhaani, yiirale, "Ti yeeyo emphavelaaka," nto khupacerya ophuwa okhalana ekumi. Nlo naahivaha ekumi epantte eyo ya ethhaya. Okhala wira, nsuwa naaveleehiwe kahi wira nivahe ekumi nluku, kahi wira nivahe ekumi ethhaya, masi wira nivahe ekumi ekumi ya epyo.

<sup>129</sup> Vano, Erooho Yoowaarya enoorwa vano. Tthiri, khinaaveleelihiwe... Xeeni atthu othene ahinrowaaya waakhela? Khaniveleeliheriwe yaawo.

<sup>130</sup> Mutthu mmosa aahikiirela, "Miyo nkinaamini. Nkincala ethhu mwaarowaanyu ohimya. Vakhala wira mwaamuwerya

waahihimuxa alipa-ookhwa, wala etthu p'itthu, ni waavoniha arettā, ni wooniherya Eyo khula enamuna, miyo nlelo nkinaamini Iyo.”

<sup>131</sup> Miyo khwira, “Vekeekhai nnari. Nyuwo mwa mulipa-oohaamini. Khenihimya etthu wa nyuwo. Nnakhalaka khinveeliheriwe nyuwo. Aveleeliheriwe ale anrowa waamini.”

<sup>132</sup> Mutthaka ti wa mulipa-oowaamini. W'ale ampweteya, onkhala ololo; masi w'ale ari mwa Kristu, ni akhanle epantte ya Epyo yeeyo, Eyo Ekumii.

<sup>133</sup> Ehantisi aka yaamukhaani enimuhimya mulimi ohelaka nooce, ahiiso nooce na xawawe vathi va mwalyakhu. Munnona? Xawawe ole mwaamukhaani aari, vekeekhai, owo aari mu-ovo aari yoopattuxiwa ekhaani, yootikiniha. Okathi mulimi ula vaairale-awe etthu owo aairale-awe, ohela nooce nla na xawawe vathi va mwalyakhu ula. Nto owo khimutothola mwalyakhu ootheiha, ni aari o—aari mwaamukhaani, ootikiniha. Owo khaalikana n'awo. Mapururu awe khayaari ntoko akina aya, ni owo—owo paahi... Owo aari mwaamukhaani, ootikiniha saana. Ni alyakhu othene akina yaamusuwela owo okhala ootikiniha. Vano mwalyakhu aaneettasa...

<sup>134</sup> Owo hata khaasiveliwa yoolya ole aamulyihaawe. Owo khiyaamusivela tu otholasa mweehilini. Owo, owo khiyaamucala eyo. Vano owo aanixanka mwaha wa xeeni owo aarinaawe okhalaka ootikiniha vale, khula enamuna. Munnona? Ni owo khaalawicha etthu p'itthu ya... Owo aalya paahi voophiyerya wira emukhaliheke mukumi, okhala wira owo khiyaamusivela esivelo aya, moone. Okhala wira, owo khaari mwalyakhu, opacerya wene. Munnona?

<sup>135</sup> Ni mwa—mwalyakhu aaniretteha, ni moosuwela, “Mahiku a miiriirya aavira. Khekhanle etthu ene eyo. Wiitakanika ni ekereja.” Eyo khayiiweya saana, ni mwaamukhaani owo. Tivo owo aanimutthara mwalyakhu mpakha nihiku nimosa ame awe...

<sup>136</sup> Xawawe muulupale aanisuvela wira aahirela mooce manciene, ni naahikhala nimosa naahaleela. Owo aahisuvela wira xawawe ole aari nipuro nlo, vano owo khupacerya omwaavya. Nto owo aahivava aviraviraka ethoka ya mwaako, ni mukhatoni, ni mapuro othene owo aakhane-awe okhalaka. Mwa okathi ula, owo, ola okathi wa owo wira oyariwe-ene. Ola okathi wa owo wira ototholiwe-ene. Khwira, “Khino nakhuku orookela khwiyya nooce naka; khino marepo. Nkisuwenle. Yookhala etthu ekunxe nooce naka. Masi miyo koosuwela... Nooce nlo nri mmuruni mwaka. Kihaana mwaana nipuro nlo. Kihaana omwaavya.”

<sup>137</sup> Ti siiso Muluku. Owo ti Xawawe Muulupale. Mmuupuweloni mw'Awe Owo aahisuvela wira aamurowa okhalana Ekereja. Owo aahisuvela wira aamurowa okhalana atthu. Voohicala

exeeni yaaweeepesa, voohicala vathi va xeeni awo atotholiwaaya, Owo onoowaavya. Owo oniwaavya Awawe.

<sup>138</sup> Nto nihiku nimosa, voothariha ehantisi, xawawe ola maama aavava vasulu va ehili. Owo aamphavela mapuro othene, vano owo khumphwanya. Oh, ohihi muwa weiwo, wira asuwale wira vekeekhai owo khaari mwalyakhu, mwa sothene. Owo aari xawawe! Ni okathi wothe ne aaxuttihive oweha vathi, omphavela mwaaxikokho wala ethu mw'ehilini. Masi owo khwiwiwa okhuwela, wiirale, “Nkawehani *nno!*” Vano owo khuweha osulu, nto yaahikhala yoopattuxiwa emosa yaarina mapupha yaavikana imeturu xexe, ooweryaxa waavikana alyakhu othene yaari mw'ehilini, ni khuhimya wira owo aari mwan'awe.

Owo khwira, “Maama, koophwanyeni sayi?”

<sup>139</sup> Khwira, “Mutuphe paahi, mpacerye omanamana mapupha anyu, maana nyuwo mwa xawawe.”

<sup>140</sup> Moone, owo aahisuwela wira aahikhala mwaana nipuro nlo. Voohicala wira aaleliwe vayi, owo ookhalana mwaana nipuro nlo.

<sup>141</sup> Ni Muluku onnisuwela! Aleluya! Owo ookhalana Ekereja yootthommwa, yootthokihiva khalayi-ene! Owo aahisuwela wira ookhalana aana alopwana n'athiyana, ni Mwaakameliwa, onlipelela nipuro nlo; okathi Erooho Yoowaarya empaceryaaya ovava vasulu vaya, eyo Ehupu iyo ehakhinyiwaka. Oh, wulu! Owo mmosaru nsana, olelo, ni mahiku othene. Kahi ehantisi ya ethale, masi ekeekhai!

<sup>142</sup> Voohicala akavi yeererya omuleela, “xawawe,” owo khaasuwela ethu yaari xawawe. Nnakhala vo, owo aari xawawe. Owo khaarowa osuwela mpakha woona ethu yaamoonihenrye, owo oonihenryaawe, kiireke.

<sup>143</sup> Nto okathi onoonaahu, kahi muromolelo, kahi Ph.D., nnakhala LL.D., kahi namwaattamanani ooreera murima; masi mwaana a Muluku oowuupiwa voolikana ni Muluku, ni Owerya wa eyeettiheryo wa Muluku wira yaakhule yoovekela ya nihiku nla, wira Owo mmosaru nsana, olelo, ni mahiku othene, khaavo hata mwalyakhu onrowa woovarelani. Owo oniwaavya Ame awe. Owo xawawe, opacerya wene. Owo onnisuwela. Xawawe ola eekeekhai onnisuwela wiithana wa Masu a Muluku. Mwaha wa xeeni? Owo xawawe. Xawawe wa xawawe! Masu ohinatthi mulipiheryo, Masu wa Masu! Masu, oothommwa, wa Masu oolepelika okathi. Nyuwo munnisuwela opuro anyu. Owo onniphavela Eyo.

<sup>144</sup> Ela nto, erutthu ila ya vathi, envahiwa ekumi ni oruuhiwa ni Erooho ya Muluku envaha ekumi wira yiiweleleke Masu a Muluku.

<sup>145</sup> Naakuvaka. Okathi owo aatthunaawe osuwela moota aakhanly'awe ophiyaka vale ni yoowo, owo aahixuttihiwa khaawerya wira yeeyo. "Khamunwerya owela osulu ovikana sinweryaanyu otupha." Owo mwalyakhu. Munnona?

Masi xawawe ola khwira, "Kahiyo siiso."

"Ahe, nkaaweheni alyakhu!"

<sup>146</sup> "Hata wira alyakhu ala axeeni, nyuwo mwa xawawe. Mpacerye paahi wookola mapupha awo, ni ovarihia muteko vakhani. Mpacerye owela!"

<sup>147</sup> Masu wa Masu! "Miteko Miyo sinvaraaka nave-tho nyuwo munoovara. Ole onikaamini Miyo, miteko sinvaraaka nave-tho owo onoovara." Munnona? "Okhala wira miyo ka mukumi, owo onookhala mukumi nave." "Ni vakhala wira Erooho emuhihimunxe Owo mw'alipa-ookhwa enkhala mwa nyuwo, Eyo enoovaha ekumi erutthu anyu enkhwa." Munnona?

<sup>148</sup> Eyo eniira exeenii? Vano nwiriyane, wira musuwele. Nto Paasikha ola, kintthuna wira ohimyaxe ethu wa nyuwo ovikana khula Paasikha otonko awe wira. Munnona? Kintthuna wira moone. Hiyo noosuwela etthu aamwiirihalyawe Owo; masi kintthuna wira moone, kahi onrowa wira, Oowiirelani yeeyo nyuwo. Munnona? Eyo eniira exeenii? Eyo envaha ekumi erutthu enkhwa. Erutthu ila enookhwa hiyo onkhalaahu-mo, Owo onvaha ekumi yeeyo, mwa moolomo makina, enruuha mw'Ekumini.

<sup>149</sup> Vano, nyuwo mwaatonko weetta ni soona muulupale mwaano mwanyu, n'itthu sothene, wala nikuttha na asikaro; ni nyuwo athiyana mutonko okhalana maihi ookhuveya, oowiipintari, ni mwiiraka siiso, ni mwaawaraka akaputtula, n'itthu siiso; naanaanoru, Etthu khukhuwela, vano nyuwo khuweha vathi va nto yaari Masu. Moone, Awo aavaha ekumi yawinyu... Nyuwo khwira, "Nkinaaththuna-tho akaputtula, nkimmuththuna-tho aalikoro, kхиwaavo-tho wootha, kхиwaavo-tho wiiya, kхиyaavo-tho *ela, ele*." Munnona? Erooho emuhihimunxe Owo mw'alipa-ookhwa, ekhalaka mwa nyuwo, enooruuha-tho irutthu sanyu sinkhwa, etthaya ya vathi, wiiwelela. Munnona? Exeeni iyo? Wiwelela exeeni? Kristu. Kristu taani? Masu. Kahi teyoloxiyya, masi Masu!

<sup>150</sup> Vano nyuwo muniira, wira, "Itthu iya, oh, kinoona wira ti yoolikana athiyana owara ikalsa."

<sup>151</sup> Nave, Masu yiirale, "Nnari." Moone, Eyo enoovaheryani ekumi Yaawo. Munnona? Nyuwo moovariwa murima ni Yeeyo. Moone, ti nyuwo, nto. Eyo enikhala... Nyuwo munikhala epanitte ya Masu. Eyo yooruuha erutthu anyu, kahi...

<sup>152</sup> Ahe, nyuwo muniira, "Ahe, vano, mukihiyе kooleeleni etthu. Pastore aka..." Khenikicala etthu pastore anyu ohimmyawe; t'ile Masu anihimyaaya! Mwaaththunaka okhala mwalyakhu,

mukeleleke oholo ni yoowo. Masi pastore alavula voovirikana ni Masu ala, vano owo kahiyo mulipa-oowaalyiha axawawe; uh-huh, owo namaalyiha alyakhu, moone, kahi a axawawe. Munnona? Kawawe onlya Yoolya ya xawawe. Munnona? Eyo ennivaha ekumi!

<sup>153</sup> Bibilia ohimmye wira ti yoonanara wira yeeyo, ni mulopwan'ovo ni sikina sothene siniiraanyu, ti yoovonyeya. Mwiire, "Mahiku a miiriirya aavira." Bibilia ola ohimmye wira Owo mmosaru nsana, olelo, ni mahiku othene. Awo yaahimyaka wira, "Eyo osoma miyuupuwelo. Ni muthinto mmosa w'osoma muupuwelo, olamula nno sa mmurimani. Ni soowoona iya sothene ni ithu, wira ethiruu," moone, awo alyakhu. Awo khansuwela ele ekhanle Yoolya xa xawawe.

<sup>154</sup> Masi, munna, mwaiwa okhuwela iwo, yookhala Etthu mwa nyuwo! Nyuwo mwa xawawe, opacerya wene. Mwaha wa xeeni? Nyuwo mwa Epyo, mwemmo ohihimuwa wa M-w-a-a-n-a wiireiye-aya, ni ehahikhinyeriwaaya Ehupu elapo ya vathi, wira oosuweiliheni wira nyuwo mwa xawawe ni kahi mwalyakhu a muromolelo. Munnoona yeeyo? Hah!

<sup>155</sup> "Vakhala wira Erooho emuhihimunxe Owo mw'alipa-oohkwa," Masu, Eyeettiheryo ya Masu, "enkhala mwa nyuwo, Eyo enoovalha nave-tho ekumi erutthu anyu enkhwa." Vano hiyo ninkhala sayi erutthu ya erutthu Awe ni nikhuva na nikhuva Nawe? Okhala wira, naakuvaka, nlelo hiyo ninaamwi naari anatampi ankhwa, ookhwa, oolikana wira nikhwae, irutthu iya, Eyo envaha ekumi erutthu iyo. Exeeni *ovaha ekumi?* "Oruuha mw'Ekumini." Erooho yaasiveliwa owurya, weettasa pure, oraruwa, ni sothene iya, yoovahiwa ekumi; vano, etthu ene ehookhwa, ni moohihimuxiwa. Eyo envaha ekumi erutthu anyu enkhwa.

<sup>156</sup> Tivo, irutthu sanyu empa ya Eyeettiheryo, okhala wira (mwaha wa xeeni?) okhuma wopaceryani nyuwo mwa epantte ya Mekaanika. Oh! Vo ti vari ohihimuwa wanyu. Vo ti vari Ekereja moohihimuwani, ni Yoowo. Irutthu iya naanaano va ti soovahiwa ekumi. Moone, nyuwo muhiiwa; munnaamini. Eyo ehorukunxani okhuma muromolelo okela Mmasuni. Munnona?

<sup>157</sup> Eyeettiheryo, yarwa vamaasini, enoopuphuruwa paahi, "Mahiku a miiriira aavira." Pomp-pomp-pomp, "Oh, kinnimwaamini Bibilia," pomp-pomp-pomp, "masi khekha—khekhanle no . . ." Pomp-pomp-pomp! Munnona?

<sup>158</sup> Masi Owo vamphwanyaawe oktaano ekonto emosa, "Burrrrrr," enkhuma ethimakaka, moone. Moota, wulu, Eyeettiheryo emphiyeryaaya Yeeyo! Masi Eyo yamphiyerya Mwalyakhu, khenvara etthu. Masi okathi Eyo enimphiyeryaaya xawawe, owo onookhuma avavaka. Amen! Eyeettiheryo ni Mekaanika! Munnoona enihimy'aka? Eyo ti wii, owo akhala-ru xawawe eekeekhai vano, owo "onimwiiwa saana."

<sup>159</sup> Mukihiyē koolakiheryeni Yoolempwa yaamukhaani va. Kinoona wira aattipihiwa atelefooni, masi nlelo niri vaava. Yohani Oowaarya 5:24, Yesu ohimmye wira, “Ole oniiwa Masu Aka, ni onimwaamini Ole okirumme, ookhalana Ekumi ehinimala.” Vano nwehe, miyo kinrowa keettaka mphironi ni okuxa eyo vekeekhai, ele ehimmye aya, kihirina maiwelo a muroohoni... Kihirihaka Eyo ohimya etthu ekina, masi ohimya paahi ele Eyo enihimy’aya, moone, nuulumo noolikana vo, mw’Ekereku, mwa yoopacerya, nnihimya wira, “Ole oniiwa saana Masu Aka.”

<sup>160</sup> Vano, wira kooniherye wira eyo ekekhaii. Miyo kinoorowa nno, nto va onrwa namuhapaliwa eettaka mphironi, ni mwaara a mulopwana mukina mmoononi mw’awe, ni aruwanaka, ni oromola Nsina na Muluku veethiru, n’ithu sothene sikina siiso. “Eyi, muhiwa etthu mulaleyi ohimmy’awe? Muhiwa?” “Ayo, kihiiwa Eyo!” Eyo khenihimya wira ookhalana Ekumi Ehinimala. Munnona? Munnona?

“Ole oniiwa Masu Aka,” ole okhanle xawawe!

<sup>161</sup> “Vano, Munna Branham, kintthuna-tho Yoolempwa ohiya yeeyo.”

<sup>162</sup> Vaareera, “Ipwittipwithi Saka sinniwa Nsu Naka. Oohimusuwela iyo khasimmutthara.”

<sup>163</sup> Ntoko mwaha wa *Othelana Ni Omwalana*, nihiku nlo. Okathi Erooho Yoowaarya ekihimenryaaya yeeyo, miyo kaahirwa khuhimya siiso ntoko Eyo yaakihimenrye-aya.

<sup>164</sup> Muhanō mmosa mulaleyi khukipwapwela saana, akhuwelaka vakhani. Owo khwira, “Kinoona wira munkuxa opuro wa Muluku?”

Miyo khwira, “Nnari, muthiyana.”

<sup>165</sup> Khwira, “Ahe, nyuwo mwaaleenle wira itampi saya sooleveleliwa.” Khwira, “Vayi?” Khwira, “Muluku paahi t’orina owerya.” Moone, mFarisi mukina. Munnona?...?...

<sup>166</sup> Miyo khwira, “Moone, wira musuwele, wira, Yesu aahimuhimeerya Petru n’arummwa, vaamanly’awe okhalana muupululo wa Ole Owo aary’awe.”

Owo aamuhimenrye wira, “Nyuwo mwa Kristu, Mwaana a Muluku.”

<sup>167</sup> Owo khwira, “Ooreeriwa ti nyuwo,” moone, “mwaana a Yona; erutthu n’iphome khewuupululenleni Ila, masi Atithi Aka ari Wirimu t’awuupululenleni. Vamwala va Miyo kinooteka-vo Ekereja Aka; mikhora sa mookhwaani khasinwerya oxintta Yeeyo. Vano Miyo kinoovahani ihulelo; sothene sinrowaanyu otthuka vathi va, Miyo kinootthuka Wirimu; enrowaanyu otaphula vathi va...”

<sup>168</sup> Owo muupululo yoowo w'eMuluku wa Masu oowiipaka erutthu. Vakhala wira Eyo yaari erutthu nihiku nle ni Mwaana, Mutheli, Eyo erutthu olelo ni Mwaakameliwa. Munnona? "Ale onrowanyu waalevelela itampi, awo anooleveleliwa; ale ohinrowaanyu waalavelela itampi, awo khanleveleliwa."

<sup>169</sup> Vano, ekereja Katolika enookuxa eyo khwaannya anamukuttho aya, masi eyo ti y'erutthu.

<sup>170</sup> Nwehe, yaari Masu oowuupululiwa, mwa erooho yiirale eyo!

<sup>171</sup> Mwaha wa yeeyo Owo aahimeenry'awe wira erowe yapatise mwa "Nsina" n'Atithi, Mwaana, Erooho Yoowaarya. Owo aahisuwela wira awo yaanimusuwela Owo aari Pani.

<sup>172</sup> Kilavulaka ni mulaleyi mmosa mwaamukhaani nihiku nlo, owo aahikiirela, owo khwira, "Vano, Munna Branham, miyo kookhuma khwiitakaninha, khurowa ekereja *khata-khata*, ekereja ya Pentekosite."

<sup>173</sup> Mwemmo, aPentekosite vano aapacerya omulya oxitiya oovilikeya, moosuwela. Nyuwo muhiwa eyo, woona waka; koxeri, muluku a mweeri, moosuwela. Ni othene aya aakupali ni annimulya. Mulopwan'ola khwira... Mu—muthukumano awe waaroomurowela; owo khwira, "Ele miyo enreerihaka ti yooreerihowi." Vano, kahi ele namukuttho enihimy'awe, owo "ohaana owerya wo orukunxa khukhala erutthu ya Kristu"? Moone, thanu na mosa sa emosa ni etuusiya nuusu ya ekina, ekhalaka emosaru.

<sup>174</sup> Nto owo khwira, "Kintthuna kookoheni etthu." Owo aaphavela otthyawa mwaha owo wa opatiiso mwa Nsina na Yesu, okhala wira ola aari mulopwan'ole iirale aari—aari nwanani a Kristu wira siiso. Owo khwira, "Munuupuwela wira ti yootthuneyaxa wira mutthu apatisiwe mwa Nsina na Yesu Kristu?"

Miyo khwira, "Ayo, mulopwana."

<sup>175</sup> Owo khwira, "Vamanly'awe opatisiwa ni nsina na 'Atithi, Mwaana, ni Erooho Yoowaarya?"

<sup>176</sup> Miyo khwira, "Ayo, mulopwana. Owo khopatsiwe, nnakhala. Munnona? Owo khopatsiwe, nnakhala; hata Nsina. Eyo etiitulu." Miyo khwira, "Khenkupaliwa." Miyo khwira, "Mwaha wa xeeni—mwaha wa xeeni Petru..."

<sup>177</sup> Owo khwira, "Ahe, vano, mukihiye kooleeleni etthu." Owo khwira, "Vano, mwa Miteko 10:49, owo ohimmye wira, 'Petru nlelo alavulaka moolumo ala, Erooho Yoowaarya yaahaakhuruwela.'"

<sup>178</sup> "Masi," miyo khwira, "owo khurukunuwa khwira, 'Ookhala oniwersya okhottiherya maasi wira atthu ala ahipatsiwe?"

<sup>179</sup> Owo khwira, "Ahe, nyuwo mwaalavula vale, okathi vakhani ovinre, mwaha wa Miteko 19, vaavo Paulo aavinre-awe

mmittettheni sa wEfeso, khwaaphwanya awiixutti ale.” Nto khwira, “Vano,” khwira, “awo khiyaapatisiwe mwa nsina n’Atithi, Mwaana, ni Erooho Yoowaarya.”

<sup>180</sup> Miyo khwira, “Nnari, awo yaapatisiwe ‘orukunuxa murima,’ kahi oleveleliwa wa itampi. ‘Orukunxa murima,’ okhala wira yiira ehinatthi osuwelihiwa Yesu nlelo. Mukuttho wiira ohinatthi ovahiba.”

Owo khwira, “Ahe, xeeni vaatthuneiye-aya awo opatisiwa?”

<sup>181</sup> Miyo khwira, “Mulopwana aarina ihulelo, ohimmye ela, ‘Okhala wira musuweleke wira khanivo Nsina nikina vathi v’Erimu nivaheriwe eriyari y’atthu, mukhanlyanyu woopoliwaka ni nenlo.’”

<sup>182</sup> Woopowa onkhala paahi mwa Nsina na Yesu Kristu. “Sothene siniiraanyu ni moolomo hata ni miteko, mwiireke sothene mwa Nsina na Yesu Kristu.” Khanikhanle nsina nikina, hata ekereja, hata eththokiheryo y’oruma, nnakhala itiitulu, wala ethtu ekina! Nnakhala vo, Owo ti Ethutu ya Saroni, Ekhokowa ya Mukhatoni, Ettheneeri y’Oxaka, Alfa, Omeka, Ephattu ni Emalelo, Yehova-yire, -rafa, manase, sothene iya. Owo itthu iya sothene, masi nnakhala vo Owo...Khiwaavo woopowa mwa hata emosa wa itiitulu iyo; Yehova, hata woopowa; Ethutu ya Saroni, hata Owo okhalaka, khokhanle woopowa; Tithi, Mwaana, wala Erooho Yoowaarya, khuwaavo woopowa. Nsina paahi na “Yesu Kristu!” Vano nto Bibilia ohimmye, wira, “Orukunxa murima n’uleveleliwa wa etampi ohaana wiixuttihiwa mwa Nsina Nawe, opacerya oYerusalem, ni mpakha omalenle elapo.”

Owo khwira, “Munuupuwela wira ennivirikana?”

<sup>183</sup> Miyo khwira, “Mwenye, kintthuna kookoheni ethtu emosa.” Owo ni miyo, ni amwaar’aka, naakilaanthe vameesa. Owo aammalaru ovira. Okoona, khurowa... Miyo khwira, “Oowaili ahu n’anammuttettheni a wArizona; hiyo ninkhala wенно. Nto miyo, ni hiyo ninnisuwela ekonselyo ahu, ni namathoonyerya ahu, ni sothene, ni mukhulupale ahu a mpooma, kuvernatooro, itthu sothene.”

Owo khwira, “Ayo.”

<sup>184</sup> Miyo khwira, “Vano, vaakhanle wira kaamooolelani, munna, wira, ‘Murowe nno mwalepihe mwaha wa yoolya ahu y’ohiyu, mwa nsina na Kuvernatooro a Elapo ya wArizona,’ nyuwo mwaamurowa olepa siiso? Munuupuwela wira yaamwaakheliwa eyo vameesa?”

<sup>185</sup> “Vano,” owo khwira, “Kinoona wira nnari.” Owo khwira, “Xeeni Yesu akelaka ohimya siiso?”

<sup>186</sup> Miyo khwira, “Ti yeeyo, moone. Mwaha wa xeeni? Kooleenleni wira ‘murowe mwalepe mwaha wa yoolya ela y’ohiyu, mwa nsina na Kuvernatooro a Elapo ya wArizona,’ ni

hiyo niryeene anammuttettheni a wArizona, ni nimusuwelaka ole okhanle Kuvernatooro, vano, mwaamusuwela wira mwaahaana olepa mwa nsina na ‘Sam Goddard,’ moone.” Miyo khwira, “Okhala wira, owo ti Kuvernatooro a elapo. Miyo nkirina yo wookohakani. Nyuwo moosuwela t’ani okhanle Kuvernatooro. Nto, okathi Owo iiraly’awe, ‘Tithi, Mwaana, ni Erooho Yoowaarya,’ Owo aanisuwela moota yaarowasaaya opatisa. Awo yaanisuwela wira Owo aari Pani. ‘Ipwittipwitthi Saka sinniwa Nsu Naka.’ Munnona? Munnona?”

Owo khwira, “Oh, kinnoona.”

<sup>187</sup> Masi vano, etthu enttharelana, munimwaamini? Munnona? “Ole oniwa Masu Aka, ni onimwaamini Ole okirumme, ookhalana Ekumi ehinimala.” Nto Ekumi ila esya Ehinimala yaakkhalaka mwa nyuwo, ti oweryaneyea.

<sup>188</sup> Okathi munaakhelaanyu Erooho Yoowaarya ela vano, awo yaakhelanse-aya oPentekositeni; awo yaari mekaanika, vano Eyeettihero yaahaana orwa. Awo yaahaamini. Moosuwela, apatthani ahu ooreera murima aPatista anniimeerya wira, “Okathi hiyo onaamini ahu, nookhalana.” Masi, awo khayaarina, anaamwi yaaminni.

<sup>189</sup> Miteko 19, awo yaahaamini, masi khayaarina. “Muhaakhela Erooho Yoowaarya okhuma okathi mwaaminni anyu?” Munnona? Awo yaarina Mekaanika, vaareera, okhala wira arummwa yaari... Wala, kinihimya wira, Apolo aamwaaxuttiha ni wooniherya ni Bibilia, Mekaanika, wira Yesu aari Kristu, masi awo khayaarina Eyeettihero nlelo. Munnona? Ti yeeyo. Vaareera.

<sup>190</sup> [Nipuro vahiitthu mufiitani—Mol.]...-kaanika, nyuwo vooveryaneyea mookhalana neemexeryo, owehererya.

<sup>191</sup> Vano, vanaakhelaanyu Eyeettihero, moovahiwa ekumi okhuma mwa okhwa khukela mwa ohikhwa. Enniiriha erutthu yothene wiiwelela Masu. Eyo ennoopakihani voovirikana, oweha woovirikana, okhala voovirikana. Eyo enimookhalihani oovirikana.

<sup>192</sup> Vano nkawehani...[Nipuro vahiitthu mufiitani—Mol.]... ovahiwa ekumi. “Nyuwo mwaahikhwa mutampini ni soottheka, ni mweepiphini, Owo ohoovahani ekumi.” Mwaha wa xeeni? “Erooho Awe emuhimunxe Yesu,” voosisu wa Paasikha, “mw’alipa-ookhwa. Nto Eyo yaakkhalaka mw’erutthuni mwanyu enkhwa,” vano nwehe, “Eyo ennivaha ekumi nave-tho, enniruuha mw’Ekumini, enimookhalihani oowiwelela Masu.”

<sup>193</sup> Vano, muniwerya sayi ohimya wira mookhalana Erooho yeeyo, nave munaihuluxa Masu? Nyuwo munvahiwa ekumi ni etthu ekina. Maana, Eyo enoovaha ekumi irutthu sanyu sinkhwa wa Masu. Vekeekhai, enimwiira.

<sup>194</sup> Khimukhanle okelelaka ohoolo muhirina Eyo. Munrowa opuphuruwaka, mwaahaamini-ru yothene Eyo. Mwakhalana-ru epantte emosa kasoliina nto epantte ekina maasi, khamunrowa hata nipuro. Munnona? Muhaana omukuxa ipursento emiya, kasoliina. Mwaahiire, enoophutuwa ekhumelaka ottuli, nto khamunrowa okhalana owerya. Munnona? “Masi miyo—miyo kinaamini *ela*, masi nkinaamini *Ele*,” pomp-pomp-pomp-pomp. Khimunrowa hata nipuro.

<sup>195</sup> Masi, oh, mwakuxaru omalela! Epatte ni yeeyo, Masu othene Ekeekhai!

<sup>196</sup> Vano nwehe vano, nimalihaka, nwehe ela. Nwehe, vekeekhai eri ntoko ekhaani—epyo yaamukhaani emphwanyaneya mutthayani.

<sup>197</sup> Vano, vooweryaneya, nyuwo moohihimuwa. Nyuwo moohihimuwa okathi munaakhelaanyu Erooho Yoowaarya mwa nyuwo. Nyuwo moohihimuwa okathi ene yoowo. Erutthu anyu vooweryaneya yoohihimuwa.

<sup>198</sup> Nkawehani epyo yaamukhaani. Mwaale mutthayani. Ehaana owurya v'ephattuweloni Vawe, maasi aniyeheruya vathi. Nto yaawuryaka, enimunnuwa mpakha wa Yoowo, ephieryaka olikanaxa ni epyo yaakenle mutthayani. Munnona?

<sup>199</sup> Ekereja erwiiye siiso, mwa okhalihwa naxariya, oreerihwa, opatiiso wa Erooho Yoowaarya, vano enoophuwa. Munnona? Erooho ya Muluku evinre mwa yothene eyo.

<sup>200</sup> Nto erooho ya molumwenkuni erwiiye eviraka mwa nwanani a Kristu, enamuna emosaru, nto vano enoophuwa mwa wiiraana wuulupale wa ikereja, moone, ethu yothene.

<sup>201</sup> Ni mutthu onrwa siiso. Itthu sothene sinvara muteko mwa enamuna emosaru, mwa eyeettelo emosaru ya Muluku, okhala wira Owo mmosaru nsana, olelo, ni mahiku othene. Nwehe, mphironi mwanyu, munnuwaka mpakha omalela wa ohihimuwa, mweettihiwaka ni Erooho!

<sup>202</sup> Ntoko nsuwa, n-s-u-w-a, ninruuha mwiri ule mukhaani onwurya veephattuweloni va Muluku, onthikela paahi... Moone, owo onwerya owurya mw'etthu emosa paahi. Muyeeherye makhura epyo eyo yaamukhaani emaara emosa; mwaamwiiva. Ti yeeyo. Muyeeherye maasi oottakatta, maasi ahikhanle ooreera, oonanara, anookhoottiherya wunnuwa. Khonrowa wiima muhokorokho. Eyo ekeekhai? Masi muyeeherye maasi ooreera a epula, amen, ahirina ikiimiku soopakiwa ni mutthu, yaale paahi anrwa okhuma wirimu osulu, nto nwehe mwiri mwaamukhaani owo. Khaavo maasi anrowa wunnuwiha owo ntoko maasi a epula. Muhele kolooru ni itthu, ntoko mumphavelaanyu oniiriha hiyo, ni, naanaanoru, onimwiiva mwiri.

<sup>203</sup> Ti yeeyo eniireya olelo. Awo aneererya waavaha maasi ankhuma veephattuweloni ya muromolelo, nto anookhoottiherya wunnuwa. Munnona? Masi mmuthuniherye aphwanye:

Murwe vaavo mattoittoi a ikhari anaary'aya;  
 Anaarya mwa miyo othana ni ohiyu,  
 Yesu, Waarya wa mulaponi.

Nto moosuwela saana, nto.

Ninrowa weetta moWaaryani, Waarya iwe wooreera,  
 Onrwa vaavo mattottoi a okame wa ikhari anaary'aya;  
 Anaarya mwa miyo!

<sup>204</sup> Mukumihe iphattuwelo iya soopakiwa ni mutthu mwa miyo! “Khekhanle hata ephattuwelo ekina miyo ensuwelaaka, hat'etthu woohikhala Ephome ya Yesu!” Eyo ti Ephattuwelo yothehne miyo enthunaaka osuwela. Mutthuniherye Masu ekhale mwa miyo, Pwiya; mukhuwari Yaawo ni Erooho Anyu.

<sup>205</sup> Nwehe, vano, vakhala wira Erooho ele emuhihimunxe Yesu mmahiye, enkhala mwa nyuwo, vooweryaneya mookhalana Ekumi; ooweettihowi ni Erooho, wira evahe ekumi Masu, wira mwaamini Yaawo. Etthu ile yaamukhaani enootthikela esukhumelaka ota okathi eninnuwaaya.

<sup>206</sup> Nwehe, oPentekositeni, irutthu saya saahivahiwa ekumi wa Ekumi esya. Nkawehani nikhuru nle na anawoove.

<sup>207</sup> Kinimoopisihani vanci-ene? [Muthukumano oniira, “Nnari.”—Mol.] Nkawehani, kinimwiivihiha paahi, ti yeeyo, woona oreera. Oh, wulu!

<sup>208</sup> Nwehe, awo yaari anawoove. Nwehe. Masi, awo yaahikhalanasa Mekaanika. Munnona? Masi othene aya yaakilaanthanse vale, yiiraka, “Oh, kinniwoova. Oh, kinnova okhuma ni ohimya, okhala wira, oh, mapixipu ale othene aalupale ni itthu ota iwe. Oh, kinnova. Anamukuttho ale ni itthu, kinnova ohimya yeeyo, kinnova ohimya wira koomwaamini Yoowo. Oh, nkinwerya wira eyo, moone.”

<sup>209</sup> Masi, naanaanoru, Eyeettiheryo yaahirwa. Ayo. Nto Eyo yiirale exeenii? Eyo khiyasarihale erooho aya paahi, muhina, masi Eyo yaahivaha ekumi mekaanika aya. Irutthu saya saahivahiwa ekumi. Awo khayaari-tho anawoove. Awo yaahikhumelasa ota oholo w'atthu. Ayo, mulopwana. “Nyubo atthu a oYuteya, ni nyubo munkhala oYerusalem!” Weiwo, Eyeettiheryo ehinathhi orwa, awo yaaryaya mekaanika paahi. Munnona? “Nyubo atthu munkhala oYerusalem, musuweleke ela, ni mwiwe masu aka! Ala khahapalasiwe, ntoko sinupuwelaanyu.”

<sup>210</sup> Miyo ka mmosa a yaawo. *Ela ti Yeele!* Kinoowoonihani exenee iyo. Eyo ti Yoolempwa. *Ela t'Ile!* Ni miyo kweekwe kinnihimyaka, “*Ela yaahikhale Yeeyo, mukihiyi kisuke yeela mpakha Ele orwa.*”

<sup>211</sup> “Nnari, ela ti Yeele yaahimmwe ni profeta Yoweli, ‘nto enimwiiraneya mahiku ookiserya, onihimya Muluku, Miyo kinimwaamwaraxela Erooho Aka atthu othene.’” Moone, Eyeettiheryo yaahirwa mmekaanika. Awo khayooovasa-tho.

<sup>212</sup> Akina wa nyuwo atthu munoova wira muthiyana onimootheyani mwaha wo okhalana maihi oorakama, wala ohiya wiisoottiha itthu; akina a nyuwo alopwana munoova mutthenkeso anyu owoomolani mwaapatisaka muthukumano anyu ni opatiiso wa Yoolempwa; munnitthuneya wiiwalela empa y'osulu mpakha Eyeettiheryo orwa. Ti yeeyo.

<sup>213</sup> Eyo yaahaarukunxa. Eyo yaahaavaha ekumi. Eyo yaahaakhalihha oovirikana. Awo yaari atthu oorukunxiwa, okhuma vaavo mpakha ohoolo. Eyo yaahaavaha ekumi, mwa makhalelo a khalayi ookhala anawoove, mpakha okhala ntoko Kharamu a nihimo na Yuta. Awo vekeekhai yaahoonana ni okhwela waamini, yaahikhomeliwa mmiikimanyoni, okhomeliwa vamwiikimanyo erukunxeliwe vathi, opahiwa, yaahirihiwa mulittini mwa amwatto. Khiwaakkhanle-tho woova, wa yaawo. Okhwa khuwaarina oxintta wa awo, nnakhala. Eyeettiheryo yaari mmekaanikani. Ayo, mulopwana. Eyo yaahivaha ekumi erutthu aya enkhwa.

<sup>214</sup> Vano nwiriyane. Va yookhala ethtu ekina, ntoko mooniheryo. Eyo yaahaavahaxa ekumi mwa enamuna emosa mpakha (Nyuwo moosuwela?) awo yaahivenxeriwa mapuro a Wirimu, ni irutthu saya sinkhwa saahivahiwaxa ekumi mpakha elavulelo aya orukunuwa. Eyo paahi... Eyo yaahivaha ekumi elavulelo aya. Ti yeeyo Bibilia ohimmyaawe. Ni, irutthu saya sinkhwa sivahiwaka ekumi, elavulelo aya yaahivahiwaxa ekumi. Miyuupuwelo saya saahivahiwaxa ekumi. Irooho saya saahivahiwaxa ekumi. Makhalelo aya yaahivahiwaxa ekumi. Awo yaahivahiwaxa ekumi, voomalela! Awo yanitthuna olavula, nave khyiaawerya olavula mattaava makina a atthu. Awo yaahivahiwaxa ekumi Ohoolo wa Muluku mpakha yaalavulaaya ilavulelo isya, nttavaa na Wirimu. Whish! Owerya xeeni woovaha ekumi!

<sup>215</sup> “Vakhala wira Erooho emuhihimunxe Yesu mw'alipa-ookhala mwa nyuwo,” oh, aleluya, “Enoovaha ekumi erutthu anyu enkhwa.” Enimoopakihani itthu mwahihirakaanyu khalayi. Awo yaahisareya Owerya woovaha ekumi nto. Munnona?

<sup>216</sup> Erutthu anyu kheniwelela-tho etampi; nyuwo, sootthuna sanyu.

Owo onimwiira, “Mukhumele ota nno!”

Nyuwo muniira, “Mutthuke eyano anyu.”

“Oh, hiyo nrina muulupalexa . . .”

“Mutthuke eyano anyu.” Wulu, nyuwo mwa xawawe!

<sup>217</sup> Mootoko woona moota xawawe oneettaawe vootaphuwa? Owo khontupha-tupha ntoko marepo, moone, wa khula etthu yookhwa, ni enama yoowunnta yothene emphwanyaneya vathi. Nnari, mulopwana. Owo oneetta owiisoona.

“Mutthuke eyano anyu.”

“Oh, va yookhala yolya y’ohiyu yooreera *va*.”

<sup>218</sup> “Kahi wa miyo. Moone, soothuna saka soorukunxiwa. Ikhwilyu saka ti soovirikana. ‘Khala wira mutthu khonkhala mukumi paahi ni enama yoowunnta ya molumwenkuni, masi ni Masu othene ankhuma mwaano mwa Muluku.’” Xawawe eekeekhai oovahiwa ekumi onkhala ni Yeeyo. Amen!

<sup>219</sup> Oh, ni Owo oomuhihimuxa Kristu mmahiyе, akhalaka mwa nyuwo, oovaha ekumi erutthu anyu enkhwa Ohoolo Wawe. Nyuwo moosuwela Eyo. Nyuwo khamuhiyo-tho namathola. Nyuwo mwa xawawe. Khamunthuna itthu sa molumwenkuni. Nyuwo mwa mwaana mulopwana ni muthiyana a Muluku. Nyuwo mumpaka niira v’Ephattuweloni olumwenku ohinsuwelaaya hat’etthu ya yeeyo. Nyuwo munwurya Vaavo. Mutthu onnisuwela... Olumwenku khonsuwela hat’etthu ya yeeyo. Nyuwo munnya Emana yiipitihwe olumwenku hata ohinasuweleke-aya etthu ya Yeeyo, okhala wira nyuwo mwa xawawe. Nyuwo moovahiwa ekumi mpakha osulu munweryaanyo ophwanya Yeeyo. Khimunwerya ophwanya Eyo vathi *va*, muhaana owela osulu *nno*. Muhaana ovahiwa ekumi, oovenxiwa osulu iwe, wira Eyo yoovaheni ekumi.

<sup>220</sup> Awo yiirale exeenii? Awo yaalavunle nttaava nikina. Bibilia ohimmye wira awo yaahilavula. “Awo yaahilavulasa mwa khula mattaava othene vathi v’Erimu.”

<sup>221</sup> Mwaamuwerya otthokelela yeeyo, irutthu iye sinkhwa saari vale, saakhanle wiiraka, “Ahe, nkisuwenle, vano, sinto kinoowerya waamini yeela wala nnari”?

<sup>222</sup> Naanaanoru, awo yaahivahiwa ekumi mpakha owali wa Kharamu a nihimo na Yuta omorela mwa yaawo, mwa Ehupu iyo yaahakhinyiwa. Oh, Xawawe ole aahirwa owiithhana Awawe! “Ni khiyaaphentale ikumi saya mpakha okhwa.” Amen.

Ni anooroowa okhala akina-tho anrowa ovaha  
ephome y’ekumi aya  
Maana Ehapari yooreera ela ya Erooho  
Yoowaarya ni okhwalala waya wooxeerya.

<sup>223</sup> Nto Mwaana ohaana okhala—wiisoniherya-tho, mwa Mwaakameliwa mahiku ookiserya; Owerya woovaha ekumi ohaana orwa, waavahaka ekumi okhuma miromolelo iya sookhwa ni iyaaminelo, mpakha Masu makumi a Muluku mukumi. Oh!

<sup>224</sup> Nnari, Eyo yaahaavaha ekumi okela mw'Ekumini esya. Eyo enniirela etthu emosaru hiyo vano. Nwehe, nto, awo yaahivahiwaxa ekumi mwa Owerya iwe woovaha ekumi! Vano miyo . . .

Nwiriyane oratteene vano. Kimphavela owoonihani.

<sup>225</sup> Owerya woovaha ekumi khuwaari paahi mmunepani mwaya, masi waari mwa yaawo othene. Eyo . . . Kahi Eyeettiheryo paahi yaakenle, wira evahe ekumi, masi Eyo yaahivahia ekumi mekaanika. Munniwa enihim'yaka? Awo yaahivahiwaxa ekumi mpakha malumi aya opacerya olavula mattaava makina. Awo yaahivahiwaxa ekumi ni Owerya wa ohihimuwa wa Kristu, mpakha yaawiixaathery'aya matata aya . . . Awo yaahivahiwaxa ekumi ni Owerya woovaha ekumi, mpakha, okathi yaawiixaatheryaaya matata aya aretta, awo yaanivona. "Eyo yaahivahia ekumi erutthu aya enkhwa." Awo yaahivonihiwa, mwaha wo wiixaatheriwa matata.

<sup>226</sup> Nto Erooho yaahivahia ekumi opatthana waya vamosa ni Muluku, mpakha yaakkhalanse-aya nave oovahiwa ekumi Mmukhaleloni mwa Muluku mpakha, mutthu akhwa vale nto munepa aya khurowa, Eyo yaanimwitthana okhala-tho mukumi. Amen! Ovuwa! Vano kinnoona okhala natiini.

<sup>227</sup> Eyo ekeekhaii, oovahiwa ekumi! Ohihimuwa Wawe khiwaari wa Yoowo paahi, masi wa ole onthuna, wa Epyo ela yootthommwa emphwanyaney aye. Envaha ekumi, ennivaha ekumi erutthu enkhwa!

<sup>228</sup> Awo yaaniwiixaatherya matata aretta; awo yaanivona. Awo yaahivekela; mwa Erooho yaanoona soovoona, owiitthana ookhwa otthikela ekumi. Ti yeeyo. "Yaahivahia ekumi erutthu aya enkhwa."

<sup>229</sup> Eyo yakela mwa nyuwo; vakhala siiso . . . Vano, nyuwo munooverya ohimya wira ti siiso; masi vakhala siiso, ithoonyeryo iya sintthara yeeyo, moone. "Eyo envaha ekumi erutthu anyu enkhwa." Eyo enimoovahani ekumi.

<sup>230</sup> Vano, nwehe, ovahiwa ekumi Ohoolo wa Muluku. Mwaha wa xeeni? Yaari Erooho ya Muluku emuhihimunxe Yesu mmahiye. Nto, Erooho ya Muluku, "Miyo kinaavaha Ekumi Ehinalima," enrwa mwa nuulumo n'Ekeremu, mwaphavela vale, Zoe, yeeyo eneetihiela ovira mwa nyuwo vano nto ovaha ekumi (sawaya) hata muupuwelo aya.

<sup>231</sup> Vano nkawehani. Munwerya sayi ohimya wira Erooho eyo enkhala mwa nyuwo? Munaamwi mwiirale sothene muupuwelaanyu wira saari soolikana, va eri eyooniheryo anyu vakhala wira mookhalana Yeeyo wala nnari. Vakhala wira Erooho yaari mwa Kristu eri mwa nyuwo, Eyo naveetho enimoovahani ekumi mpakha Mmasuni, okhala wira Owo ti Masu. Nto yakhala, yoovirikana, ni woovahani ekumi yoohuluxakani Masu, weeso kehiyo Erooho ya Kristu! . . .

voohicala exeeni mwiraly'anyu, Eyo yaahookelihekeni Mmasuni. "Ipwittipwithi Saka sinniwa Nsu Naka, ni iyo sinookhala ni Masu othene," Masu othene! Miyo kaalavula yeeyo nihiku nlo.

<sup>232</sup> Ame aka yoomi, awo aarowa vano, ni awo yaari muthiyana mmosa ootikiniha saana. Ni awo yaari, moosuwela, ntoko muHinti nuusu, ni yaari ootikiniha. Masi mwa yeeyo awo yaari mutthu ahaaloha. Masi miyo nkinoona... Awo yaarina sooloха xexe wala thanu, ekumi aya yothene. Masi khula okathi yaalohaaya yooloha, yaakhala ekeekhaii. Awo yaloha ethhu, yaari ekeekhaii.

<sup>233</sup> Kinnupuwela emaara emosa kipaceryaka-ru olaleerya, miyaakha sinci-ene khalayi. Hiyo naakhala weno nno ephiro yeela, osulu nno vakhani. Miyo kaalaleya vaava ekereja yeela. Vano khuloha, wira miyo keemenle va vakhiviru va ixikatta tthaaru. Ni keemenle, kaalaleeryaka atthu othene, wira yaahaana owela ixikatta iya tthaaru ehinatthi ophiya rampha muulupale. Ni muramphani muulupale naahikhala nliinya nikhaani nootteela ntoko nluku noowaarya, naarowa ovenya wene olukama mi—mi—mikhora sa Wirimu, mpakha vamukhora va nluku noowaarya. Nto nluku nlo noowaarya naahookoliwa mpakha ophiya vasulu va ixikatta iya. Owo vekeekhai Mutthaka aka olelo: okhalihowi naxariya, oreerihiwa, opatiiso wa Erooho Yoowaarya! Nto miyo kaahimya wira mutthu ohaana orwa ovira ixikatta iya tthaaru, wira owerye weetta ephiro eyo yuulupale. Nto khwira wira . . .

<sup>234</sup> Aahikhala muhano mmosa aavinre vaavale. Vano, moosuwela muthinto xeeni wa ixapattho atthu yaawarak'aya miyaakha miloko miraru ni mithanu sivinre. Aahikhala muhano mmosa aavinre vaavale, aawanre ixapattho soorakama ntoko sinwaraaya olelo, ixapattho sa maxiitha oorakama. Nto owo khuvira. Nto miyo khwira, "Nwehererye minuutu mmosa, murokor'aka. Khamunwerya weetta ephiro ele yuulupale ni yeeyo." Ni miyo khwira, "Nyubo—nyubo, khamunwerya wira eyo."

<sup>235</sup> Nto owo khwira, "Ah!" Owo khwira, khwaalipela athiyana akina, khwira, "Muhiwaamini. Awo anamukhw'anepa. Munnona? Muhiwaamini. Miyo kinoooonihani wira vanooweryaneyi miyo okhalihowi naxariya, ooreerihiwa, ni osarihiwa Erooho Yoowaarya, nave nlelo weetta siiso." Nto owo . . . Miyo khumuhiya arowaka paahi. Nkaakhanle-tho wiiraka ethhu, nkaakhanle omweemexaka. Vano owo khutuphela muramphani. Nto owo khunweha munna muthiyana, khwira, "Moone, miyo kaahooleelani!" Khupacerya otthimaka, nto owo . . .

<sup>236</sup> Moosuwela, ntoko Bibilia sihimale-awe, mwa Yesaya, kapiitulu 5, wira awo yaarowa okhalanaka "exiko

yoowookowa.” Ahaana okhala siiso; sikhanyaaya oomora, moone. “Aneetta yiinaka ntoko...” Awo ahaana wira, ahaana wiittikinya, “Anrowa yiinaka, arumihaka maxiththa aya; moone, aana axithiyana a oSiyoni mahiku ookiserya.”

<sup>237</sup> Nto owo khupacerya otthimaka muramphani mme, voowaakuva saaweryaawe. Nto, nuuvira okathi, ephiro khukhala yootepa ephunyeyaka. Owo khupacerya orukurerya, ni wiina *siiso*, nto khurowa amorelaka epantte emosa.

<sup>238</sup> Nto amaama khwira, “Okhuwela wootepeaxa woopiha kitonko aka wiiwa kookhalaru, aari muthiyana ole amorelaka mmalumini mmwe a mooro ni mwiixi, arowaka vathi, vathi siiso.” Khwira wira, miyo “khurukunuwa khwira, ‘Munnona?’”

<sup>239</sup> Owo aahiiwelela itthu sothene ohiya Nuulumo nimosa, moone, itthu sothene ohiya Nuulumo nimosa. Vekeekhai, athiyana aPentekosite anoowerya woopowa, ooreerihiwa, ni osareya Erooho Yoowaarya, vano nto khuvonya. Voomalela. “Mutthu khankhala mukumi ni yolya paahi, masi ni Masu othene ankhuma.” Munnona? Munnona? Vano owo aahivonya. Nto ntoko sihimaly’aka, moone, owo aamwiira okenle, vooreera, masi, moone, owo aahivonya wiiwelela; omuhimeerya ethu yaari ohollo. Ni Owo oolepa Ehapari yooreera ovira mw’awiixutti, arummwa, ni Mwiixuttiho w’arummwa ni maprefeta, ni sikina, nave awo khaniwelela.

<sup>240</sup> Vano nwehe Owerya nno woovaha ekumi, *Zoe*, oruuuhaka Masu, muupuwelo waari mwa Kristu ori mwa nyuwo nto. Miyo kimphavela owoonihani, wira, nyuwo, okathi ohimunweanyu. Okathi Muluku omuhimunxe-awe Yesu mw’alipaoakhwa, Owo ohoohihimuxani, nave. Ni ohoovahani ekumi okela mw’Ekumini, ni Yoowo, vano nyuwo moovahiwa ekumi okela mw’Ekumini, munaamwi okathi ule nyuwo mwaari mukhalelo paahi mmiyuupuweloni Sawe, masi Muluku aahoona sothene mwa Yoowo, woomalelani, moone. Okathi Muluku owehaly’awe erutthu...

<sup>241</sup> Erooho yaahimuhiya Owo, Omatta w’oKetisimani. Owo aahaana okhwa, mutthu. Muupuwele, apatthani, Owo khaarina wira yeeyo. Ole aari Muluku. Muluku aahittikitthela erutthu iyo, yeeyo yaari erutthu ya mutthu. Ni Owo khaa...Owo aawenle-ru, ntoko Muluku, Owo khaarowa okhwa enamuna yeeyo ya ekhwelo; khivanweryaneya omwiiva Muluku. Masi Owo khaarina wira.

<sup>242</sup> Masi, muupuwele, Owo aaronwe iwe ni nyuwo mwa Yoowo. Moone, Muluku khaanvalaaninhe Mwaakameliwa ni Mutheli, nlelo. Nto okathi Muluku owehalyaaawe erutthu ya Kristu, Owo aawoonale oowaili mulopwana ni muthiyana. Yothene yaahivuluxiwa mw’erutthuni memmo emosa. Munnona? Awo mmosaru, mamosaru, Masu mamosaru. Masu mamosaru, onlavula Mutheli, onnilavula Mwaakameliwa.

<sup>243</sup> Ahe, onwerya sayi Mwaakameliwa orwa, ni ohooniherya sothene silaiheriwe sa Yoowo; nto vanrwaawe Mutheli, nto Owo khaarowa okhala Mwaakameliwa? Masi Owo vairalyaawe sothene, hata ooniheriwe mwaha wo wiihihimuxa Mwaneeene mw'alipa-ookhwa, numala, vano khori—Mwaakameliwa khorina wira etthu emosaru, khorina okhalaka woolikana ele Masu ahimme-aya wira Owo aamukhala mahiku ala ookiserya? Owo khorina yo ohokolowaka mwaha wa Malakhiya 4? Owo khorina wooniheriwaka ntoko saary'aya mahiku a oSotoma? Olumwenku khorina okhalaka siiso ntoko siry'aya? Itthu iya khasihiyo osuwanyeihwa woolikana wa Masu a Muluku ninsuweihiwaahu?

<sup>244</sup> Ahe, apatthani, koosuwela wira kinoopisihani okathi munici-ene, minuutu muloko ni mithanu mpakha olya wa ohiyu, masi khino kiniira kimalinhe-ene okathi uwo. Masi nwehe, nkawehani va, etthu xeeni yoolikana. Nkisuwenle liini onrowaaka owoonani-tho. Munnona?

<sup>245</sup> Nkawehani, nwehe ela. Masi Muluku aahimoona Mwaakameliwa khalayi ene mwa Mutheli. Aleluya! Moone, wira amoopole Mwaar'awe, ntoko Atamu, Owo aahaana orowa ni Yoowo. Atamu aanisuwela etthu owo iiraawe; Hawa khaasuwela etthu iiraawe, masi Atamu aahikhuma vamosa ni mwaar'awe. Munnona? Nto Yesu aakunxe opuro wa Mwaar'awe khukhala etampi mwaha wa Yoowo. Muupuwele, Owo ohiikhaliha nyuwo, Owo ooħħawa ehukhumu anyu, wira nwerrye okhala voopuroni Vawe. Owo ohiikhaliha voopuroni vanyu, wira nwerrye okhala voopuroni Vawe. Ophenta xeeni! Opatthana xeeni! Ninwerya sayi okhootta? Ninwerya sayi hiyo wira etthu ekina woohikhala omphenta Yoowo, mpatthani? Kaamuwerya okhala mwa yeeyo iwoora, masi nrowe nikelele oħħolo vakhaani-tho.

<sup>246</sup> Ntoko musuwelelo wa pentekosite olelo, ni orwa wa Erooho Yoowaarya mahiku ala ookiserya, ntoko saalaiheriwe-aya, eri ntoko elepelilo ya epaphelo y'ekhalanelo. Munnona?

<sup>247</sup> Vano, nyuwo muooowerya okhalana epaphelo. Vekeekhai. Munnona? Nyuwo muooowerya okhalana epaphelo ya ekhalanelo y'ethu, masi eyo nlelo khenihimya wira ti yawinyu. Nnari, mulopwana. Mutthu mmosa a ottaiwene aamuwerya orwa ni ohimya wira ti yawave. Masi mwakhalana elepelilo, eyo enooniheriwe wira sothene saakhanle soovirikanya soofuciwa, mpakha ottuli w'ephattuwelo. Eyo ekeekhai?

<sup>248</sup> Nto mutthu ahimya wira owo onnaamini Masu, vano nto okathi Erooho Yoowaarya enrwaaya, Eyo elepelilo ya ekhalanelo. Ni eyo ennoothuniheryani, mwakhalana-ru elepelilo eyo, wira yothene eyo ti yawinyu, ni itthu sothene siri vaavo iyo ti sawinyu. Amen! Nto eyo enninivaha elepelilo, okathi Erooho Yoowaarya enrwaaya mwa epaphelo ya ekhalanelo ela Muluku oonalyaawe wu ohinathhi opattuxiwa

olumwenku, khuhela nsina nanyu Muliivuruni mw'Ekumi; masi oyariwe ni mulopwana ni muthiyana, ni khukhala oowiiwelela etampi, ni ootheka mwaha wa etampi. Masi okathi waaminni aka Eyo, kihaakhela epaphelo; masi okathi Erooho Yoowaarya erwiiy'aya, yaari elepeliwo wira itthu sothene saari sookivirkanya miyo, yakhala ethu ame aka yiirale-aya, atithi aka yiirale-aya, apiipi aka yiirale-aya...

<sup>249</sup> Ntoko mwanamwane, nacile kinvekelenle-aka, minuutu vakhani sivinre, ekhumme mw'axipwaapu awe. Ecile yaamurweenle, mwaana, ntoko sihimalyaaka.

<sup>250</sup> Masi vanrwaaya elepeliwo, Eyo yaahifuca, kхиiipithiha sothene. Miyo ka ole orina elepeliwo nto. Amen! Ni voolikana ntoko Erooho emuhihimunxe Kristu mw'alipa-ookhwa, kookhalana epaphelo y'ekhalanelo wira ka epantte a Erutthu yeeyo, ni elepeliwo ya Erooho Yoowaarya yiirihaka erutthu iyo ya Masu okhala voolikana ntoko Eyo siiraly'aya mwa Yoowo, ntoko Owo silaihenryaaawe nihiku nookiserya. Elepeliwo! Itampi saka sothene soofuciwa, itampi sanyu sothene soofuciwa, ni Ephome ya Yesu Kristu, nto Erooho Yoowaarya ehoorwa ntoko elepeliwo ya ekhalanelo Muluku okivahalyaawe ni mahala, mwaha w'osuwela khalayi ene. Oh, wulu!

<sup>251</sup> Munova exeeni? Khivanxankiha Owo iiraly'awe, "Muhoove; Miyo ka Ole kaakhwiye ni kinkhala-tho; ni miyo kookhala voohimala-tho; ni kookhalana ihulelo sa mookhwaami ni omooroni." Muhixanke mwaha wa hat'ethu. Hata okhwa khoniwirihani yootakhala. Nwehe. Ti yooreera!

Nrowe naakuve vano.

<sup>252</sup> Epaphelo y'ekhalanelo! Eteeni yoolinvwa. Sothene saavirikanya soofuciwa. Ha-ha-ha! Ovuwa! Pooti wira kiniira ntoko mulolo, masi kinoona oreera. Nwehe. Munnona? Oh, epaphelo y'ekhalanelo, nyuwo munnisuwela ethu eyo enihimy'aya? Nyuwo munnisuwela ethu enihimy'aya, munna? Khiivo hat'ethu enwerya okumiha mwa nyuwo. Amen. Miyo ka namakhalana. Amen. Exeeni e...

<sup>253</sup> Epaphelo y'ekhalanelo exeeni? Miyo vano kookuxa ntoko namattottela muraarelo, okhwa Wawe, ovithiwa, ni ohihimuwa. Owo ohiikhaliha miyo, wira kiwerye okhala Yoowo. Vano, Owo ohiikhaliha natampi, wira kiwerye okhala mwaana, amen, ni okhalana epaphelo ya ekhalanelo. "Tthiri ithoonyeryo iya sinimwaatthara ale anrowa waamini," moone, epaphelo y'ekhalanelo!

Vano naakovaka, ehinaththi... Nihaana minuutu soophiyaka muloko tho.

<sup>254</sup> Nrowe niwehe vano, naakovaka, ovaha ekumi wa Erooho. Kinrowa owoonihani ithoonyeryo imosa-imosa wira musuwele saana. Nkawehani, vano nwehe wira, "Owerya nno woovaha ekumi" waari mwaha aka. Numala Mwaana ohihimuwa,

nkawehani moota Eyo yaawiirihale-aya ale oPentekositeni, etthu yaawiirihale-aya, etthu Owerya iwo woovaha ekumi waawiirihale-aya. Waahaavaha ekumi.

<sup>255</sup> Vano nrowe niwehe etthu Eyo yaamwiirihale-aya Sitefano. Sitefano aahisareya Owerya woovaha ekumi. Khayaari siiso? Moone, owo aahisareya Owerya woovaha ekumi. Khiyaamukhalinhe oowoova. Owo iirale, “Nyuwo oolipa murima ni oohinnuwihwa mmurimani ni mmaaruni, okathi wothene munikhotta Erooho Yoowaarya; ntoko siiraly’aya axitiith’inyu, ni nyuwo muniira siiso. Tuuvi wa maprefeta yoonihenrye orwa wa Naxariya, axitiithi anyu ahinvonnye-aya ni maluku?” Oh, wulu! Yaahiira etthu mwa yoowo. Vekeekhai, owo aahisareya Owerya woovaha ekumi.

Vano awo khwira, “Hiyo nnimwiihuluxa mutthu uwo!”

<sup>256</sup> Nto vakhwiyaawe, awo, yaahinvonyakasa ni maluku; nto muru awe woohaawaseya, maluku ammanaka siiso. Owo khuweha osulu khwira, “Kinnoona Erimu otthukuwa.” Owerya woovaha ekumi waavara muteko. “Kinnoona Erimu otthukuwa, ni Yesu eemenle moono woolopwana wa Muluku.” Ti yeeyo Owerya woovaha ekumi waamwiirenlyaaa Sitefano.

<sup>257</sup> Nkanweheni mutthu mukina, aarina Owerya nno woovaha ekumi, nsina nave aari Filipe. Owo khaareere osareya Owerya woovaha ekumi. Owo aarina muthukumano muulupale wu oSamariya. Axetwani yaamoomoliwa. Atthu yaampatisiwa mwa Nsina na Yesu Kristu. Awo yaarina muthukumano w’ekekhai. Nto Erooho khulavula ni yoowo, oh, e—Eyeettiheryo khukhuruwa, nto Eyo khwira, “Muhiye muhakalaliho ola.” Masi arumeyi anrowa ohimya exeeni? Khivanvirikana etthu awo anihimyaaya. Munnona? Owo aahisareya Owerya woovaha ekumi. Owo aahikhala kasoliina, ni e—Eyeettiheryo yaanimukhuruwela. Khwira, “Murowe mothakoni.”

<sup>258</sup> Nto owo khumphwanya mulipa-oohuliwa iwe, khumpatisa mwa Nsina na Yesu Kristu; mulopwana mmosa, aaroihale Mutthaka w’Etiyoopiya. Eyo ekekhai? Ni owo aahimwiwelela Muluku.

<sup>259</sup> Omwiiwelela Muluku, vakhala wira khimunatoko opatisiwa mwa Nsina na Yesu Kristu, mwiire, nto nwehe Owerya woovaha ekumi woovenxani. Munnona?

<sup>260</sup> Okathi Sitefano iiraly’awe etthu ila yuulupale... ahiiso, kahi Sitefano. Masi Filipe vairalyawé etthu ila yuulupale, ohiya muhakalaliho ole muulupale ni khwiwelela sooruma sa Muluku, aamalihenryawe, mwaha w’osariha... Mwaha wo ompatisa mulipa-oohuliwa ola, amwiiwelelaka Muluku, owo khaareere osareya Owerya woovaha ekumi mpakha omukuxa. “Eyo enoovaha ekumi erutthu anyu enkhwa, vakhala wira Erooho ela emuhimunxe Yesu mw’alipa-ookhwa.” Eyo yaahinvaha ekumi Filipe mpakha vahooniwaawe khino imiilya ni

miloko mithanu, nipuro nikina, elapo ekina. Eyo yaahivaha ekumi erutthu awe enkhwa. Owo iirale sayi? Owo aaroosareyaxa Owerya woovaha ekumi.

<sup>261</sup> Oh, Ekereja ya Muluku mukumi, hiyo khaninwerya weemela vamapeleni a esokhari ninkhalaahu naamwaka-vo va olelo. Nihaana okhala oosareya ni ovekelaxa, ni Owerya woovaha ekumi, mpakha ovaha ekumi wa Erooho Yoowaarya! Nihaana okuxiwa, nihiku nlo, Mookuxiwani. Ayo, mulopwana. Amen! Oh, wulu!

<sup>262</sup> Kileveleliwe nuulumo nlo. Miyo kaamuupuwela maama ompaka mirupa iye sikhaani, hiyo naarumeelakaahu, ni mwaanaa. Amosa-amosa a nyuwo aximaama atokweene munnuupuwela yeeyo. Okathi ttuutthu aapaceryawe wunla; naakuxa ekafe vakhani yooxiliwa ni esokhari vakhani, oputaputela vanrupani ni omunuulika vaavo, wira nimmaalihe paahi. Khasivo ikuru mwa yeeyo. Yaammwiiva. Munnona? Kafeyiina eyo mme, ni itthu, yoosivihiwa vakhani wira nimmirihe, wari onvaha kafeyiina.

<sup>263</sup> Hiyo noolamwa mwaha wa itthu ntoko iyo. Mutthike! Nyuwo mwa axawawe; mutthikele Masu! Mukhale a mwiitti; khiyaavo enwerya osikulihia miyonelo sanyu, tivo mootaphuwa mwa ekwattulelo yothene ya mutthu. Etthu p'itthu mutthu onoohimyanaaweni ya nthowa, eyo eniruuha-tho ophenta paahi. Amen. Nto, Owerya woovaha ekumi, oniroiha Wirimu, xawawe ovanve mpakha vasulu va alyakhu, osulu wu mapuro a Wirimu mwa Kristu Yesu! Oh!

Owo waari mwa Filipe. Waanvanhe ekumi, khumukuxa.

<sup>264</sup> Nrowe nimukuxe mutthu mukina. Aahikhala mulopwana aaitthaniwa Enokhi. Vano, owo aaheetta ni Masu othene a Muluku, mwa miyaakha soophiyaka imiya thanu. Owo aahikhalaana onamoona, wira, "Miyo nkinatoko ovonya hata okathi mmosa Masu Awe." Owo aahisareyaxa Owerya woovaha ekumi mpakha Eyeettiheryo vamukhuruwenlyaya, Mmekaanikaniki, owo hata khaarina okhwaaka; owo aaroovenxiwa paahi orowa Owaani. Aaroopacerya weetta paahi. Owo khaareere... Ntoko Filipe, owo khaareere osareya Owerya woovaha ekumi, ohiya orowa oKaaza ni orowa nipuro nikina, weiwo, awo yaamphwannye-aya owo wu olimani. Ohiya orowa wu, owo aaroorowa paahi, oh, khwira, "Miyo ka mutthu oowuuluvula, khula enamuna. Kihaana Owerya wowaatta woovaha ekumi, kinrowaaka weetta paahi kikhume elapo ya vathi."

<sup>265</sup> Iwo ti Owerya omosaru woovaha ekumi hiyo orinaahu naanaano va. Moone, Owo onoovaha ekumi erutthu anyu enkhwa. Eyo kahi ekeekhai? Ti Owerya woovaha ekumi.

<sup>266</sup> Enokhi, ni onamoona owo wooloka voomalela, wira, "Itthu sothene Muluku okileenle-awe wira kiire, kihira.

Itthu sothene kiwenryaka woona wira Owo ookileela wira, kihira." Nto aahikhala oosareyaxa e—Eyeettiheryo, ahiiso—Mekaanika, mpakha, okathi Owerya woovaha ekumi ommanne aya, Mekaanika, waaroonvenxa paahi. Owo aaheetta akhumaka elapo ya vathi, orowa Wirimu.

<sup>267</sup> Vano, vano nwehe, vanaasiwa Eliya. Nuumala... Nkawehani, Eliya, profeta ole muulupale, mulopwana nihiku nawe. Kileveleliwe. Munna mulopwana, muthiyana, nihiku nenlo owo aahaapwapwela saana athiyana ale owiipintari wiitho, maYesapeli ale ni maAkhabi. Nto khweemela mpakha... Nto khaavo, aakhala ntoko, aamweemererya yoowo. Ni owo aahipwapwela, aahivotha, ni khukhala oolipa vale, ni Muluku aahimukhapelela ni omukhaliherya mapuro othene. Moosuwela, mutokweene owo aahikhulumuwa nihiku nimosa. Owo khwira, "Kinimuuluvula, tivo nkinwerya okeela ohoolo." Owo aarowa ophiyerya, woona waka, miyaakha miloko mithanu na mixexe; oowuuluvula saana, ni eettaka vale, ni owo khaareere osareya Owerya woovaha ekumi. Moosuwela? Owo aahiweha epantte ekina ya Yordani.

O Muluku! Miyo kinnihalela owerya woona epantte ekina. Khamunwerya?

<sup>268</sup> Oosareyaxa Owerya woovaha ekumi, mpakha, voonalyaawe ekaaro yootthukeleliwa iwe, ikhavaloo kamosa-kamosa sa Mooroo ni ekaaro ya Mooroo, sootthukeleliwa vamvirini iwe. Owo aaroolapuwa muro paahi khurowa Owaani, hata ahikhwiye. Owerya woovaha ekumi waaveleelihive, waahiiriha ekaaro okhuruwa okhuma Wirimu khimukuxa. Hata khurula ekhasako awe khimurihelela Eliya. Ti yeeyo.

<sup>269</sup> Vano, nto mwaapara owo khuttotta nlaya nlo, ethoonyeryo ya Ekereja tho, moone, khuttotta nlaya nlo. Vano, owo aahipaka vaara vaili miiriiry, yeyo ekhanle ethoonyeryo ya Kristu ni Ekereja. Munnona? Eliya aapanke mixexe; owo aapanke mithanu na miraru. Moone, vano, owo aari—owo aarina owerya vaara vaili, okhala wira owo aavekenle siiso. "Itthu suulupalexia ovikana iya Miyo sinvaraaka nyuwo munoovara." Munnona? Masi owo khaareere osareya Owerya woovaha ekumi, ni sothene, mpakha owo wira sothene iya, vaara vaili, seiyo Elisewu saapanke awe, ovikana ole saapanke awe. Ni nwehe, owo aakhala ekumi yoolipa mpakha miyaakha soophiyaka miloko mithanu na miraru wala miloko mithanu na mixexe, owo aahuuluvula nto owo—owo khukhwa. Owo aahikhwa, ni khu—khukuxiwa khusikhiwa.

<sup>270</sup> Moosuwela, ahe, Owerya iwe woovaha ekumi khiwaamuhiyale. Miyaakha, ni miyaakha nuumala yeyo, okathi erutthu yinttale aya mmakhuvani mwawee, owo aari mmahiye. Nto awo yaamukunxe mutthu aakhwiye nihiku nimosa, ni khumoona nwanani, vano awo khimurihela mulopwan'ola

vasulu va makhova a Elisewu. Waahikhala Owerya woovaha ekumi wowaatta mmakhuvani mme mpakha mulopwan'ovo otthikela okumi. Oh!

<sup>271</sup> “Onoovaha ekumi erutthu anyu enkhwa.” Hata ekhwaaka ni wuntta mmahiye, nnakhala vo Owerya iwo woovaha ekumi waaphwanyaneya vatthayani vale. Aleluya! Uh! “Ole omuhihimunxe Kristu mw’alipa-ookhwa nave-tho onnivaha ekumi erutthu anyu enkhwa.” Eliya wu, Elisewu ni Eliya . . .

<sup>272</sup> Muupuwele, mulopwan’ole ookhwa, profeta ole, oosareya Owerya iwo woovaha ekumi, aaphwanyaneya mmahiye oowunnta; khiwaareere Owerya woovaha ekumi, mpakha, varihelawaawe mutthu ookhwa mwa yoowo, owo khutthikela okumi. Owo nlelo aaniwerya owiixaatherya matata aretta, khaawerya? Amen. Eyo vo.

<sup>273</sup> Nto muupuwele, hiyo n’erutthu ya erutthu Awe, Yesu Kristu. “Hiyo na erutthu ya erutthu Awe, ni makhova a makhova Awe.” Oh, khiyaavo hata enamuna ekina. Ninoorowa ohihimuwa, nto ti yeeyo tu. Munoorowa ohihimuwa, ti yeeyo tu.

<sup>274</sup> Paasikha onnihimyaxa ethu ovikana elimalelo paahi. Eyo ti ya olelo nave-tho, okhala wira irutthu sahu sinvahiwa ekumi vamosa ni Yoowo ni hiyo nikilaanthe mapuro a Wirimu.

<sup>275</sup> Ni erutthu ela pooti wuntta mphareya; pooti wuntta mutthayani; pooti ohikhala hata ekhwiyeri y’ettuurwa; masi enoohihimuwa. Okhala wira, Erooho emuhihimunxe Pwiya aka mw’alipa-ookhwa yoovaha ekumi erutthu ela enkhwa. Yoovaha ekumi erutthu anyu enkhwa. Ni hiyo n’alipa-oottottela muraarel a ohihimuwa Wawe, enamuna Awe ya Ekumi Ehinala kihinreere-aka ohimya, moosuwela. Khivanxankiha Owo ohimalyawe wira, “Muhoove.” Owo aamusuwela.

<sup>276</sup> Okhala wira ntoko Paulo sihimaly’awe, “Okhwa, mpwino anyu ori vayi? Mahiye, oxintta wanyu ori vayi? Koosareya Owerya woovaha ekumi. Nimuxukhuruku Muluku, Yoowo onnivaha oxintta mwa Pwiy’ahu Yesu Kristu.” Ayo, mulopwana! Owerya woovaha ekumi. Oh, wulu!

<sup>277</sup> Owo onkhala voohimala-tho, “mmosaru nsana, olelo, ni mahiku othene.” aHeperi 13:8. Nwehe, Mesiya, Ole oottikittheliwa; ti siiso Mwaakameliwa Awe, aMesiya akhaani, moone, Ole oottikittheliwa.

<sup>278</sup> Nwehe, okhwa khonimaliha Owerya wa Muluku woovaha ekumi. Okhwa khonwerya weemexa. Mwakhalana Owo, Ti Woohimala. Khiyaavo hat’etthu enrowa weemexa Owo. Khivanweryaneya weettiha; khinweryaneya—khinweryaneya wiiriha hat’etthu. Munookhala ekumi anyu mpakha woomalelani, eyo nlelo kheneemexa Owo; onookelela ohoolo wooloka.

<sup>279</sup> Nwehe, Moise aahisareya Owerya iwo woovaha ekumi. Khiyaari siiso? Owo aari profeta yaamurweenle Masu. Owo aari epantte ya Masu. Owo aari Masu a nihiku nenlo. Eyo ekeekhaii? Nto vaamanly'awe okhwa, nuuvira miyaakha imiya thanu na tthaaru, Omwaako wa Orukunuwa, owo eemenle vale, ni Eliya. Eyo ekeekhaii? Owerya woovaha ekumi, okhwa khommalamalika. Nnari, nnari. "Miyo kinoomuhihimuxa." Malaikha yaahirwa; khimusikha vathi vale veekhatoni. Owo aahintta ni khumalamala, makhova awe yaahimalamala, ni itthu sothene sikina, masi Owerya woovaha ekumi nlelo waari vaavale. Waahinvaha ekumi khunvenxa. Nto owo aari vale, eemenleene vale. Nwehe.

<sup>280</sup> Nyuwo muniira, "Eyo ekeekhaii, Munna Branham, nuuvira miyaakha imiya thanu na tthaaru?" Oh, wulu!

<sup>281</sup> Mwasomaru mwa Matewu, kookhalana Yoolempwa, Matewu 27:51. Mulepeke, mulepe. Okathi ale othene ottuli wu, yaaminni wira Owo aamoorwa... Bibilia oohimya va, Owo varwiye-awe, awo yaamurupa vatthayani. Owerya woovaha ekumi waari mwa yaawo, ni awo yaari epantte ya Yoowo, masantu ale. Awo yaari epantte ya Yoowo, okhala wira awo yaahimwaamini Owo.

<sup>282</sup> Vooweryaneya awo yaahikhalanasa Ekumi ile, mwaha wa mukuttho wa epwittipwithi, ettipiheryo, yoowo wahaaweryaneya erooho ya epwittipwithi otthikela-tho mwa mutthu. Ankhi vano ni Erooho ya Mutthu, Muluku Mwaneene, mwa nyuwo, moone, Oweryaxa xeeni woovaha ekumi orinaahu! Masi wira ettipihwiwe etampi mwaapwittipwithi aahivahiwa, mwa ethoonyeryo. Erinaahu kahiyo ethoonyeryo; elikaniheryo. Ninoova exeeni? Nto ale yaarina ethoonyeryo paahi, ethoonyaka ohimiuwa Wawe, nave khurowa mmahiye ni yeeyo.

<sup>283</sup> Ntoko Yobi wu aviraka mooxankani mwawe wuulupale, wulu, itthu sothene aahaakhiwa! Xetwani iirale, "Mukihiyerye. Kinoomwiiriha owo wootakhalihani ohoolo Wanyu." Vano nto owo aari ootaphuwa.

<sup>284</sup> Khwira, "Muhikuxe ekumi awe." Nto owo khwira (owo) sothene masi muhikuxe ekumi awe.

<sup>285</sup> Ni hata amwaar'awe yaahimurukunuwela. Khwira wunkha wa mwaano mwaya waahimphweela. Mwa moolomo makina, awo—awo khayaarowa okhalana naata n'uwo. Awo khiyaakhala ntoko wira yaanimpenta, yaammukakha. "Yobi, mootakhaliwa! Xeeni nyuwo ohimutakhalihaka Muluku, mukhwa?"

Khwira, "Nyuwo munlavula ntoko muthiyana oovahuwa." Oh, wulu!

<sup>286</sup> Moone, owo aahikhala oolipa ni ele aarinaawe. Vano, owo aari profeta. Owo khwira, "Miyo nkiihiyo ka natampi. Miyo koovaha mukuttho woovaheriwa." Amen. Owo aanisuwela vatthu vaary'awe. Owo aari mwa Masu. Voohicala ethtu

akina yaahimy'aya, owo aari voolikana mwa Masu. Nto okathi ule wowoopiha...Khwira, "Nyuko munlavula ntoko muthiyana oovahuwa." Owo khwira, "Apwiya ti yaakivanhe, Apwiya t'akunxe; vano, nittottopeliwe Nsina n'Apwiya!" Khwira, "Miyo kirwiye olumwenku ula kihirina etthu. Kirwiye, kihiwani'etthu, miyo kinkhuma enamuna emosaru. Nittottopeliwe Nsina n'Apwiya!" Okilaanthe-ene vale, simukhumme ithuku, an'awe akhwiye-ene, owo aahihaawa, ni apatthani awe othene yaahimurukunuwela, mamempuru a mukereja mw'awe, itthu sothene sikina, aiwakaka ni e...Ni namuhaawi saana ni ootakhaliwa! Khaavo hata mmosa a nyuko otonko ovira mwa yeeyo. Nlelo, owo aahivarelela Masu awo.

<sup>287</sup> Owo aari xawawe. Oh, wulu! Khivanweryaneya okhaliha ettiyelo wiitho wawe okathi wothene. Nnari, nnari. Naanaanoru, eemenle-ene oolipa ni Masu awo, exeeni yiiraneiye? Osulu waahitthukuwa, itari khupacerya oruma, overunya khupacerya okukutteya, nto Yobi khuweha osulu khoona yoowona ene, khwira, "Miyo koosuwela wira Nvuluxa aka ookhala. Mahiku ookiserya Owo onoovenya elapo ela. Ni hata axiitthu a musapalani aroohonona erutthu ila, makhuva ni sothene, Owerya iwe woovaha ekumi onookhala vaavo. Kinoomoona Muluku mmansaka, Yoovo onrowaaka omoona mmansaka. Maitho aka anoonweha ni kahi mukina." Eyo ekeekhai? "Hata isyo saka numala ophunyala mwa miyo, hata wira axiitthu a musapalani ari mweerutthuni mwaka vano, anoopwetexa."

<sup>288</sup> Moosuwela, axiitthu khanrwa wa nyuko. Mwaaxiitthu owo ori mwa nyuko, axiitthu musapalani mwanyu yeenyu. Mootoko oweha yeeyo? Munoooheliwa mukaxawuni, ni ottiyeliwa wira ehivire etthetu; axikokho animookhuran, siiso, okhala wira awo ari mwa nyuko. Nyuko murina axikokho, opacerya wene, mpuwa.

<sup>289</sup> "Hata axiitthu a musapalani, axiitthu a musapalani mwaka ekipwetexaka, erutthu aka, nnakhala vo n'erutthu aka kinoomoona Muluku."

<sup>290</sup> Nto voosiisu ule wo ohihimuwa! Ovuwa! Aleluya! Matewu, namalepa ola muulupale, 27:51, ohimmye wira, "Nuumala Owo ohihimuwa mw'alipa-ookhwa, wira masantu a Waataana Wa Khalayi, anci-ene w'ale yaarupa vatthayani v'elapo, yaahikhuma mmahiye, khukela mmuttettheni khwaakhumelela anci-ene." Owerya iwe woovaha ekumi, nlelo mmakhuvani mmwe mwa Eliya okathi wahaakhanly'aya-tho hata makhuva, nlelo mwa Yobi okathi wahaakhanle-aya ekschwieri ya nthupi na erutthu awe. Masi Owerya woovaha ekumi nlelo waari vaavale.

<sup>291</sup> "Vakhala wira Erooho ela emuhihimunxe Yesu mw'alipa-ookhwa enkhala mwa nyuko, Owo nave-tho onoovaha ekumi arutthu anyu enkhwa." Nwehe, naakuvaka vano.

<sup>292</sup> Nyuwo muniira, “Oh, kaanitthuna kikhanle-ene wu...” Munkhala okathi wooreera. Vano nyuwo othene... .

<sup>293</sup> Kinniwoonani mulepaka Soolempwa kamosa-kamosa. Vaareera, mulepe aTesalonika Oopacerya 4:16. Nwehe moota ereeraly’aya, moone. Mwa... “Masantu, ale anrupa mwa Kristu, Muluku onimwaaruuhu ni Yoowo,” moone, masantu mmahiye, amumulaka. Ntoko Eliya saary’awe; akina ntoko Elisewu saary’awe; moone, akina aya anoovahiwa ekumi, akina anookuxiwa, akina anrowa okhala mmahiye. Awo anoorowa ni Yoowo. “Nlope na Muluku ninooruma, nto ale akhwiye mwa Kristu t’anrowa opacerya ohihimuwa. Nto hiyo ninrowa ohala nry’ene akumi ninrowa okuxiwa vamosa ni yaawo, wira nakumane n’Apwiya osulu.” Owerya woovaha ekumi mwa ale ankhala; Owerya woovaha ekumi mw’alipa-ookhwa. Munnona?

<sup>294</sup> Owerya yoowo wa Muluku woovaha ekumi woowooniheriwa mwa maprefeta ala aili. Nkawehani masina aya, t’ohalela olikan, Elisewu, Eliya. Munnimoola Mwaakameliwa ni Mutheli? Mmosa aya ti Mwenye Yesu; mukina ti Muhamo Yesu. Moone, ntoko siiso, paahi—paahi eriyari ya—ya Mulopwana ni Muthiyana. Munnona?

<sup>295</sup> Eliya, nto nkawehani moota enooniheriwaaya va. Vano, Elisewu... Aarookuxiwa mookuxiwani, onthoonyerya Ekereja, vaareera, Eliya; nto Elisewu aahimumula mpakha ohihimuwa. Munnona? Vekeekhai eri ntoko mwaapalame, antthuneya mapupha maili wira ailipiherye mmansawe. Munnona? Ekereja yaathoonyeriwe vaavale vale mwa maprefeta ale aili. “Okhala wira hiyo ninrowa ohala nryeene akumi nihiku ninrwaaya Apwiya, khaninrowa waakhoottiherya ale anrupa; okhala wira Nlope na Muluku ninrowa oruma,” mapupha oomaili anookhala vamosa, nto ninoorowa nivavaka, aleluya, ninoorowa nivavaka. Okhala wira, (exeeni?) mwa akumi, wala ookhwa, Owerya iwo woovaha ekumi nlelo onnikhala.

<sup>296</sup> Nwehe. Muupuwele, muupuwele vano, oovahiwa ekumi wira noone itthu iya exeenii. Nkawehani Owerya woovaha ekumi wa nihiku nla. Muupuwele, hiyo noovahiwa ekumi. Woohikhala khalayi, wo okhaliherya... .

<sup>297</sup> Ni miyo—miyo kinoona wira Pwiy’ahu ohimmye wira, ni Paulo oohimya, “Ele Atithi akoonihale-aya, nkihin’ye eththu kiholeenlyaaakan. Kinimooleelani.” Ni mahiku ala ookiserya okathi woonaly’ahu Owerya Wawe woovaha ekumi mwa hiyo, Owo hata oonivaha Owerya woovaha ekumi, wira niwoone aretta ovonihiwa. Nihoona Owerya Woovaha ekumi ovaraka muteko eriyari ahu, ntoko saaryaaya okathi ule mwa awo mahiku oopacerya, moone, ninnoona wooniherya mwa yoovoona ni waahihimuxa alipa-ookhwa, ninnoonaka Owo waavoniha aretta.

<sup>298</sup> Nihiku nlo miyo kaamuleela mutthu, Donavon Weerts nno, kinoona wira nyuwo othene munnimusuwela. Miyo kaamuxaya ni yoowo. Mwammiravo oohaawa...Owo mwammiravo ooreera murima. Owo onnoorwa vaava okereja. Owo ono...Mpatthani aka ooreera murima. Nto owo pahi...Owo khwira, "Nkaatthuna woohaaxani."

<sup>299</sup> Miyo khuweha, nto niyaru nawe, naarorukunuwa, muhina waakhumenle ota. Nto miyo khwira, "Ehaali anyu, Donavon?" Khunvara ntata paahi, *siiso*, aari kankuru. Miyo khwira, "Donavon, exeeni eniwiirani niyaru nanyu?"

<sup>300</sup> Owo khwira, "Nkisuwenle, Munna Branham. Miyeeri soophiyaka mithanu na mosa, mithanu na miili, nintthikela nikhalaka..."

Miyo khwira, "Mwahaahimerya-ni ethu ya yeeyo?"

<sup>301</sup> Khwira, "Miyo—miyo nkaatthuna woohaaxani, Munna Branham."

Miyo khwira, "Moosuwela exeeni iyo?"

Khwira, "Kinnuupuwelela."

<sup>302</sup> Miyo khumpweherya ntata naka paahi, khuhihimya hata nuulumo nimosa. Mahiku maili nuumala yeeyo, kхиwaakhanle hata murala mmosa. Exeeni iyo? Owerya woovaha ekumi, moone, Owo onooovahaa ekumi erutthu anyu enkhwa. Niyaru nawe naamukhuureya, ottooporo awe waamuhononeya, moone, owo aamwiira okhwiye. Masi, Owerya woovaha ekumi! Munnona?

<sup>303</sup> Nto nihiku nimosa okathi waari-aka ookhulumuwa, yoomi, ntoko...miyo khwira, "Nyuuwo mwa...Mmiravo, vanreerela mwiire etthu, murina miyaakha miloko mithanu. Nyuuwo, mwaarowaka owiirela etthu p'itthu Apwiya, vanreerela mwaakuve mwiire. Munimuuluvala." Munnona? Nto vale voosiisu yoowo, Owerya woovaha ekumi waahirwa, nto Owo khikitthuniherya oweha epantte ekina y'ekuwo, nto miyo kiwoonani othene anyu weiwe. Uh-huh. Munnona? Owo khwira, "Sothene mutonko anyu ophenta, ni sothene soophentalenii, moovahiwa." Munnona? Kaahivoona othene aya iwe siiso. Yaari exeeni iyo? Owerya woovaha ekumi.

<sup>304</sup> Yohani mulipa-oowuupulula aahisareya Owerya woovaha ekumi, eemenle khoona emalelo okhuma wopaceryani.

<sup>305</sup> Yesaya aahisareya Owerya woovaha ekumi, aaheemela khoona eMileeniyu ni sothene.

<sup>306</sup> Owerya woovaha ekumi! "Nto vakhala wira Erooho emuhihimunxe Kristu mw'alipa-ookhwa, enkhala mwa nyuwo, Eyo enooovahaa ekumi erutthu anyu enkhwa...erutthu enkhwa." Muupuwele, Owerya woovaha ekumi!

<sup>307</sup> Nkawehani itthu sinoonaahu nihiku nla. Owerya woovaha ekumi woophiya wa hiyo, wira otthukule Ikanyeryo Thanu na piili. Yaari exeeni iyo, osuwela wa mutthu? Nnari, Owerya woovaha ekumi wa Muluku. Moone, Owerya woovaha ekumi wa Muluku waahihimya khalayi ene wira ela yaamwiiraneya. Moone, Owerya woovaha ekumi wa Muluku ohiiriha olumwenku okhalela onamoona, wira eyo Ekeekhaii. Nlaikha n'Apwiya, kaahooleelani, naari vakhiviru, Munripuni na Mooroo; Owerya woovaha ekumi woothuniherya olumwenku okhalela onamoona wira Eyo Ekeekhaii. Ni, mwa yeeyo, awo khayaasuwela yaari exeeni Iyo; nto hiyo naahisuwela, oweha paahi epantte *ila* nno, nto vale ari Apwiya ahu, moone.

<sup>308</sup> Awo ti Ale atthukunle Ikanyeryo iye. Awo ti Ikanyeryo iyo, maana Masu othene a Muluku ti Kristu, ni Kristu ti Ikanyeryo sitaphuliwe. Otaphuliwa wa Ikanyeryo exeeni nto? Kristu oowuupululiwa.

<sup>309</sup> Ni Malaikha ale mathanu na manli, yaathoonyerya Ikereja Thanu na piili sothene soomalela, ni hiyo khanaawerya nnakhala wooma. Awo ti yiirale, awo aakumiha elatarato, kahi hiyo. Nto Owo ori vale, eemenleene vale, Mphuki Muulupale; ooniheryaka wira Owo ti Alfa ni Omeka, ephattu ni emalelo. Wiisuwanyeihaa xeeni! Owerya woovaha ekumi wooniirela eyo hiyo.

<sup>310</sup> Owerya woovaha ekumi onninitthuniherya wooma orwa Wawe. Owerya woovaha ekumi woonikumiha mookhwaani khunikeliha mw'E Kumini. Owerya woovaha ekumi onnivaha olamula sa mmurimani; wira nisuwele exeeni evonyeiye ni nyuwo, ni ethu yo wira; ethu mwiiraly'anyu, ni ethu mwahaarinaanyu wira; ni ethu yaaththuneya nyuwo wira, ni ele enrowaanyu okhala. Owerya woovaha ekumi, itthu iya sothene!

<sup>311</sup> Pwiy'ahu Yesu t'osareya Owerya woovaha ekumi, Owo aari yothene Eyo, vamosa. Owo aari oosareya Owerya woovaha ekumi, Owo aahimmye ela, "Mp wetexe erutthu *ila*, nto Miyo kinoovenxa muhina mwa mahiku mararu." Ororomela xeeni mwa Owerya woovaha ekumi! "Mp wetexe erutthu *ila*, nto Miyo kino...emp'ela, nto Miyo kinoovenxa muhina mwa mahiku mararu."

<sup>312</sup> Vano, Owo aahimenrye-ni yeeyo? Owo aahisuwela wira eyo yaahilempwa mwaha wa Yoowo, moone, wira yaahilempwa mwaha wa Yoowo, ni Masu a Muluku yaawo vahaaweryaneya ovonya. Masu ahimmye wira, "Miyo nkinimuhiya Oowaarya Aka wuntta, nnakhala nkinihiya munepa Awe mookhwaani." Ni Owo aanisuwela wira Owerya iwo woovaha ekumi waamurowa onvenxa, wira khiyaarowa okhala hata erukuruku emosa yoowuntta.

<sup>313</sup> Owo khwira, "Mp wetexakase emp'ela, nto Miyo kinoovenxa-tho muhina mwa mahiku mararu."

<sup>314</sup> Mwaha wa xeeni? Yaari elaleeryo y'eprofeta, Masu a Muluku. Ni oprofeta, wakhalaru wira Masu ekeekhai a Muluku, khanivonya. Ni oprofeta mmosaru ni Masu a Muluku yaahimmye wira Owo aamurowa omuhihimuxa, onihimya wira hiyo noohihimuwa ni Yoowo. Khivanxankiha Owo iiraly'awe, "Muhoove." Ni yoolempwa, wira, "Erooho eri vano, yaari mwa Yoowo, vano eri mwa hijo, ni ennivaha ekumi erutthu ahu enkhwa." Muhoove, mpatthani, M-a-a-n-a oovenya. Mwaana oovenya. Nnari...

<sup>315</sup> Vano nkawehani woorukunuwani. Hiyo naari, khula mmosa, naahooniheriwa vaavale. Vale yaari masantu akumi yaakuxiwe, aari Eliya eemenle vale; ni vale aaphwanyaneya Moise eemenle, masantu yaakhwiye yoonihe-...Nave-tho, oowanli aya yaanikhala Owerya woovaha ekumi. Hata wira mmosa aahikhwa, nto mukina khaakhwiye, othene yaarisa vaavale.

<sup>316</sup> Nwehe, oh, nkawehani ethu ninoonaahu vano mahiku ala ookiserya. Etthu ene yeeyo Owo olaihenryaawe, Yohani 14:12. Vano nkawehani...[Nipuro vahiitthu mufiitani—Mol.] Vekeekhai.

Atthu aniira, "Munihimya okhalana owerya?" Nnari, nnari.

<sup>317</sup> Hiyo vekeekhai nri ntoko ale oMwaako wa Orukunuwa, moone. Vekeekhai, hiyo khaninihimya okhalana owerya. Masi, hiyo, ntoko—ntoko awo saary'aya...Omwaako wa Orukunuwa, awo khayaahimya wira, Moise, ohimya wira, "Moone, nkakooneni miyo ki pani," awiixutti wira, "nkakooneni miyo ki pani, nkoonani miyo ki pani." Moosuwela yaakhumelenle? Nwehe, awo yaamoonale Yesu ovuwihiwa. Ti yeeyo tu yaatthunasaaya woona wooniheriwa, Yesu ovuwihiwa.

<sup>318</sup> Nto ti siiso eryaaya olelo, hiyo khanimphavela okhala muttu muulupale. Hiyo khennicala ethu atthu annihimyanaaya. Nsina nahu khanihijo ethu; ti Nsina Nawe. Ekumi ahu, kehiyo ethu; ti Ekumi Awe. Ti Owerya Wawe, kahi owerya wahu. Ni eri ethu emosa paahi hiyo ennisivela wira, omoona Owo ovuwihiwa. Nto enweryaneya sayi? Okathi Owo onvuwihiwaawe mwa hiyo, mwaha wo ohihimuwa Wawe ori mwa hiyo. Hiyo ninnimoona Owo wooniheriwa-tho ntoko Owo saaryaaawe, olelo.

<sup>319</sup> Muhiwi saana yeeyo? Moone, otthuna wahu khuhijo ovuwihiwa. Otthuna wahu khanihijo nsina nuulupale. Otthuna wahu khuhijo ottittimaha ekereja khata, wala wunnuwihexikola ya Ttiminku, wala ophavela waaruuhu atthu, vowaakhanyererya, waapurula, mwaavahaka meera, wala oruuha ittheneeri, itthuvu, wala ethu ntoko yeeyo. Iwo kuhijo otthuna wahu. Otthuna wahu omoona Owo ovuwihiwa. Ovuwihiwa, (exeeni?) kahi ni wiisoona; masi

mwa hiyo, makhalelo ahu, wira nooniherye wira Owo mukumi ni onkhala mwa hiyo.

<sup>320</sup> Miyo kawerya-ru okhuma mphironi, wira William Branham ohuupuweliwe, ni nnakhala nyuwo muhuupuweliwe, mpakha niwerye omoona Yesu ovuwihiwa eriyari ahu. Omoona Yoowo, iwo p'utthuna wahu. Eyo ti e...enninivaha Owerya woovaha ekumi. Ni onninivaha ohakalala, osuwela wira hiyo nri ni Yoowo, erutthu ni makhuva sa Yoowo, nikhalaka Mwaakameliwa Awe; ni woona inamuna Sawe imosaru soolipiheriwa, ooniheryaka mwa hiyo wira Owo ooohimuwa mw'alipa-ookhwa. Munnona?

<sup>321</sup> Khivanxankiha Owo iiraly'awe, "Muhoove", ttiri vano, nwehe, hiyo noovuluxiwa ni Yoowo, nto vano ooohimuwa ni Yoowo. Ti yeeyo enihimya Paasikha wa atthu, "ooohimuwa ni Yoowo"! Nwehe. Vano hiyo nookhalana Erooho Awe mwa hiyo, epaphelo ya ekhalanelo yoolinvwa voomalela.

<sup>322</sup> Nnari, nyuwo muhiireke, "Ahe, miyo kinroromela wira kinoophiya." Nyuwo moophiya. Kahi, "Miyo *kinoorowa* ophiya." Miyo koophiya. Miyo nkinaphiyeke; Owo t'okiphiihale. Munnona? Kahi miyo; Owo! "Ahe, Munna Branham, awo aniiira..." Nkincala etthu awo anihimy'aya. Iwe Owo ookiirela, miyo. Eyo ti yothene entthunaaka, enikicala.

<sup>323</sup> Miyo paahi—miyo kinthuna kimoone Owo wooniheriwa. Munwerya sayi wira, omwiitthana wira akhuruwe? Nnari. Owo ori mwa nyuwo. Moone, Owo ori mwa nyuwo. "Ahe, nto, Pwiya, kawerya-ru okhuma mphironi, Nyuwo munooverya wiisooniherya. Mmansaka...Munwerya sayi Nyuwo wira? Okhala wira Nyuwo mookhalicha siiso. 'Othene ale Atithi akivahaly'aya animoorwa.'" Nwehe. Ovuwa!

<sup>324</sup> Ni mooniheryo owo wothene otthukanyiwe, ni hiyo vano voosiis'ula, oh, kinuupuwela nsipo nle:

Voosiis'ule wo ooohimuwa,  
Mikhoyi sa okhwa sataphuliwaru,  
Ninoohihuwa, (Aleluya!) ninoohihuwa.

<sup>325</sup> Munnaamini yeeyo? Ninoohihuwa! Mwa Yoowo hiyo ninkhala epante ya Yoowo, Paasikha, esiiri ya Muluku yoowuupululiwa ntoko saaryaaaya okathi ule, y'Ekumi numala okhwa. Hiyo vano n'akumi, hiyo naatonko okhwa mutampini ni soottheka. Ekanyeryo y'ekekhai ya Paasikha yookumiha okhwa vasulu vaka, nto miyo ka mukumi. Ekanyeryo ya Paasikha, wopaceryani, yootaphula ekanyeryo ya ekanyeryo ya oRooma, Ekanyeryo ya Paasikha, Owo aatthukaniwaawe. Ni atthu, okathi yaakkwaaya, yaammalamala; masi Owo ootaphula ekanyeryo khuupulula esiiri. Nto vano Muluku, ni Erooho Awe Yoowaarya, ootaphula ekanyeryo mmakhalelon i mwahu, ni Kristu onnuupululiwa Owo akhalaka mwa hiyo, ttiri vano hiyo ninvahiwa ekumi ni Yoowo. Oh, nikukhu nnikukhu!

Ninoohihuwa, (Aleluya!)

Ninoohihimuwa! (Amen!)  
 Voosiis'ule wo ohihimuwa,  
 Mikhoyi sa okhwa sataphuliwaru,  
 Ninoohihimuwa, (Aleluya!) ninoohihimuwa.

<sup>326</sup> Oh, khamuntteeliwa murima! Miyo nkireere otteeliwa murima! Iwe, munipanttani nikhaani na makhala voosiisu omosa, ikanyeryo saahitaphuliwa, nto miyo khuhihimuwa ni Yoowo, yoopattuxiwa esya. Owerya Wawe woovaha ekumi; Mwaana oovenya.

<sup>327</sup> Woohikhala khalayi, koothariheliwa ehantisi ekhaani ya mu—mulipa-oomesa. Mulopwana mmosa aahirwa onvekela mulipa-oomesa mutokweene wira amuroihe amese ihopa Olimani Onkela nsuwa. Awo khukhuma voosiis'ule.

<sup>328</sup> Akhala a nyuwo otonko ommesa salamawu, vano, munnisuwela eniiraneya, ankhala mahittette oowaatta iwe. Kinnimoona mwaamunn'aka, Eddie Byskal, iwe, misiyonaariyu a aHinti iwe. Ni hiyo naahimesa, vooreera, mmattimani mmwe.

<sup>329</sup> Vano mulipa-oomesa ola aari oopacerya wiixutta, moosuwela. Owo aaroorowa omesa, vano awo khurowa ottaiwene. Alipelelaka oxa, moosuwela. Nto awo—nto awo khiyawerya-tho wiiwa epusina ya mahittette, nto mulipa-oomesa ola khuxanka othene, khwira, “Eyi, ninrowa ophareya woowiixa! Heyi!” Khukhala ooxanka othene.

<sup>330</sup> Owo khwira, “Mukilaathi, mwan’aka. Mukilaathi.” Mulipa-oomesa mutokweene, oomaala, moosuwela. Owo aahisuwela etthu aahimyaawe. Khwira, “Mulipelele paahi mpakha nsuwa nikhumbe, nto ninoowerya woona varyaahu.”

Nyuwo muniira, “Kihaana okhala Mmetotista? muPatista? muPentekosite?”

<sup>331</sup> Mulipelele paahi. Mwaana akhume, ninimoona vatthu varyaahu. Owo ti Masu. Mulipelele mpakha moone Masu wooniheriwa, yaaryelaka Epyo, Ehupu yoohakhinyiwa, ninimoona varyaahu. Munnimphenta Yoowo?

<sup>332</sup> Kileveleliwe mwaha wo woopisihani siisa. Akavi a nyuwo anrowa ohala ohiy’ula? Oh, nitthike-tho paahi, ohiy’ula, moone. Voophiyaka iwoora thanu na piili? Mwaahikhala mutthu mukina? [Munna Neville oniira, “Nnari.”—Mol.]

Nrowe nuuramihe muru.

<sup>333</sup> Ookhala mmosa va, wala anci-ene, ahirina Owerya nno woovaha ekumi? Mwaana ohaarya, nyuwo mukilaanthe mutapernakulu mu, muhiwi ifiita, nave nlelo Erooho khiyoovanheni ekumi mukhanlyaanu ottharaka Masu a Muluku, wira nyuwo athiyana ni nyuwo alopwana nweryeke wiiwelela Masu othene Owo olemppe-awe! Oh, eyo etthu yoowoopiha. Ankhi mwaakhanle epyo yookhwa, ehikhanle Ekumi mwa nyuwo? Masi yookhala etthu mwa nyuwo,

enooleelani wira, “Miyo—miyo kintthuna kihihimuwe, voosiis’ula. Kintthuna kihihimuwe okhuma mukhalelo oryaakamo. Nkintthuna okhala epyo yookhwa paahi, ohiiwa ni ethaya mattoro oophempa. Kintthuna kihihimuwe.”

<sup>334</sup> Munnitthuna ovenxa ntata, mwire, “Mukivekelele, munna”? Muluku ooreeriheni. Muluku ooreeriheni. Wulu, nkawehani matata; khiyaavo enamuna nnakhala yo wiitthana waltaari. Ele eniitthanaahu wiitthana waltaari, atthu yaarwaaka waltaari, miyo nkineemereryaxa eyo, khula enamuna. Eyo yaacereriwe mukereja okathi wa muhakalaliho wa Metotista. Munnona?

<sup>335</sup> Bibilia ohimmye wira, “Othene ale yaamini,” moone, “yaanipatisiwa.” Yookhala etanki va, yoosareya maasi, emmulipelela namwiivaha olikanne wira okhwe mmansawe.

<sup>336</sup> Vano, nyuwo pooti opwinihiwa, imaara sinci-ene, mwa Nsina na Pwiya Yesu; masi ehikhanle wira epyo eyo Ekumii, moone, Eyo khenrowa ovaha ekumi. Nnari, nnari, nnari. Opatiiso wa mmaasini ori ntoko okame omonre okhuma wirimu; pooti omorela vasulu v’epyo, masi, khiyaavo Ekumi mmwe, khenwerya okhala ekumi.

<sup>337</sup> Masi vakhala wira opatiiso ule w’ekekhai wa mmaasini, wo okhwa mmansinyu, ni nyuwo moolikana wira mukhwe mwa sothene mutonko anyu wiixuttihiwa ni iyaaminelo ni miromolelo, sikhane soovirikana ni Masu, nto nyuwo munoorowa weetta ntoko mwaana mulopwana wala muthiyana a Muluku, ni nyuwo moolakela mmurimani mwanyu, nwehe eththu opatiiso owo wa mmaasini onrowaaya owiirihani voosiis’ula. “Murukunxe murima, khula mmosa a nyuwo, mpatisiwe mwa Nsina na Yesu Kristu wira muleveleliwe soovonya sanyu, itampi sanyu, nto munimwaakhela Ehupu, mukuttho woohakhinyiwa. Munimwaakhela Eyeettiheryo, Erooho Yoowaarya. Tthiri natiri t’awinyu, ni othene aya. Wa maloko othene, onookhala.”

<sup>338</sup> Muluku Tithi, miyo—miyo nkireere olavula, ni nkireere okuxa okathi wa atthu, masi, Pwiya Muluku, khuwaavo weemexa ela. Enkhala paahi wira muhaana ohiya ni orowa, n’umumula, n’utthika. Hiyo ninkhala molumwenkuni onkhwa, eriyari y’atthu ankhwa; ni Mutthaka wa Ekumi, ni eyooniheryo ya ohihiimuwa. Muluku Oothuneya, hiyo ninrowa okhala atthu ankhwa emaara emosa, nto enrowa okhala exenei hiyo nahiyaru okathi ula onivira?

<sup>339</sup> Mirima sahu sinoovihiwa; minepa sahu ti soohakalalihiwa; ala akenle. Nto anci-ene va aniiwa Mutthak’ola voosiis’ula. Ayo, imiya piili wala tthaaru aavenxa matata. Awo annithuna waamini, Pwiya. Oh, vekekhai epyo ele khekhwiiye, Pwiya. Awo yaarowa owerya sayi ovenxa ntata siiso? Yookhala eththu. O Muluku, ti omiyo ole, ti mwaara a Yobi eemenle vale, airaka, “Oh!” Masi, Pwiya, mmutthuniherye Yobi owo, mulipa-

oowaamini owo, akele, voosiis'ula, okhwa voomalela, ni ovithiwa va mmaasini mu mwa opatiiso.

<sup>340</sup> Mattoittoi a okame akhumme Wirimu, Masu a Muluku anihimya wira Awo anoorapiha khula etampi anoolevelela! Nyuwo mumpatisiwa mwa Nsina na Yesu Kristu, wa exeeni? Oleveleliwa wa itampi sanyu, itampi sinleveleliwa mwa Nsina na Yesu Kristu.

<sup>341</sup> Mutthuniherye, nto, Tithi, wira... Awo yakhala aretta, akhume akumi. Wira, yakhala oorakala, akhume yeettaka vathi va Owerya wa Erooho Yoowaarya. Yaakhalaka anatampi, akhume arapihiwe-ene ni oothuwa. Ni mekaanika, mwaha wo okela; Eyeettiheryo enkhuma Osulu, Erooho Yoowaarya, ni yaakuxe, Pwiya. Nvahe ekumi erutthu aya enkhwa, nto ninamwiiwa ilavulelo isya sooloka, owerya wa Muluku, ophenta ohinlavuleya, mahala mwaha wo okhwa ni mahala mwaha wo okhala akumi; ni Kristu ohihimunwe, Erutthu, Mwaakameliwa onimooniherya Owo elapo ya vathi.

<sup>342</sup> Tithi, awo t'Awinyu. Awo aavenxa matata. Miyo koolaleywa Masu. Vano, Tithi, nwaakhele, miyo kinnivekela. Mwa Nsina na Yesu Kristu, kinniveka. Amen.

<sup>343</sup> Munnimpagenta Yoowo? Owo kahi oothamaleya? Moosiveliwa nyuwo okhala epantte ya ohihimuwa iwo wa Paasikha, wira moohihimuwa ni Yoowo? Nvenxe ntata. Muri muhina.

<sup>344</sup> "An'aka," ntoko Paulo saarowaawe ohimya. Kihiphavelaka omutakiha, masi, ophenta, miyo kinnoophentani. Kiheetta mukwaha iphiro soowoopiha ni sothene sikina, wira kiphiye va, wira kiwerye olavula ni nyuwo. Kikhumme mothakoni, omuvira mwanankhaya a ethapwe, ni sikina, wira kiphiye va. Hiyo niheetta mmuteekeni. Nyuwo munnivira mulaponi mweettihaka ikaaro, wira niwerye othukumana. Hiyo ninniphentana mmosa ni mukhw'awe.

<sup>345</sup> Hiyo na epantte ya mmosa ni mukhw'awe. Muhikhalkahale mmuhiyaka Satana wooleelani ethhu ekina. Nikhalaka epantte ya mmosa ni mukhwa'awe, na epantte ya Yoowo. Ni hiyo n'anammuttettheni a Momweneni, nimpuha iparakha iya, vamosa, sa ohihimuwa.

<sup>346</sup> Nto vano, moone, vano nyuwo moohihimuwa. Okathi Muluku omuhihimunxaawe Owo, ohoohihimuxani. Mwaana vano ori wa nyuwo, ni vano nyuwo muniphuwela mwa Ekumi ntoko Yoowo, wira muhihimuxiwe voomalela nihiku nookiserya. Voowerryaneya, nyuwo muhaana naanaano va. Vansuweiwa sayi? Munep'anyu woorukunuwa, kahi siiso? Erutthu anyu yoophiyerya wiiwelela Yeeyo, kahi siiso? Wiwelela (exeeni, ekereja?) Masu, yaawo akhanle Ekumi, vano nyuwo moohihimuwa mw'alipa-ookhwa. Owo Paasikha, ni Yesu ni miyo. Owo Paasikha, ni nyuwo ni Yesu. Ni owo Paasikha, ni

nyuwo, miyo, ni Yesu. Hiyo othene na... Ahiiso, Yesu, nyuwo, ni miyo, hiyo othene noohihimuwa vamosa.

<sup>347</sup> Ni ninoorowa ohihimuwa nihiku nookiserya, hata irooho sahu sihiyaka irutthu sahu, hata irutthu sinyeelaka mukwitha, hata sikelaka muthayani, hata sipahiwaka, hata sikhalaka vathi va ephareya. Bibilia ohimmye wira, "Nlaikha naahiyeeherya yawaya mphareya, n'ithu sothene saakhwiye khuhihimuwa." Khiyaavo hat'etthu enwerya oniipithiha, wala onimwalaniha, Muluku ohinreeryaahu omphenta, onihihimunxe vamosa.

<sup>348</sup> Muluku ooreeriheni. Kihoopisihani va okathi munciene. Vakhala wira atthu awo nlelo ari mutelefoonini mmo, vekeekhai... Isentavo miloko mithanu khula minuutu, awo khareere oliva, voosiis'ula. Masi, nkaawerya omaliha ewoora emosa, kaahaana otthikela paahi.

<sup>349</sup> Vano, Apwiya yatthuna vale, kinoothika olelo ohiyu, wira kilavule ni nyuwo. Nto kaahiwerye, vano nto nyuwo othene moosuwela... Kinoona wira khaniri mu... wala mu... Khanikhanle-tho mutelefoonini? Khanikhanle-tho mutelefoonini.

<sup>350</sup> Nyuwo othene moosuwela onrowaaka, khamunsuwela? wAfrika! Kihiitthaniwa okhuma khalayi; mwa miyaakha sinciene kinitthunaka otthika. Vano yoowoona, Erooho y'Apwiya yoolokiherya ephiro. Awo ahimmye wira, okathi axineene elapo ale oohaarawa yiawale-aya, wahaaronwe-aka emaara yookiserya kaaryaaka wuuwu, yaahikokhorela vathi othana ni ohiyu, yiipulela ni wunla, yiiraka, "Apwiya, niinre-ni hiyo?" ikonto a yaawo. Atthu ale hata khanaamini wira aakhalana munepa. Munnona? Ni awo yaahinla ni wiipulela, ni wunla.

<sup>351</sup> Muhihoolihe hata nuulumo. Xontte muhiire. Moone, vaakhanle wira waamwiiraneya eviisa ele ovira iwe ni okela eriyari ya arumeyi ale, awo yaamukeemexa vaavale vale. Kihaana okela ntoko mulipa-ooxaya. Miyo kinrowa wa pwiyamwene ole aaruuhale ivakawu muloko ni thanu na piili soosareya atthu ni aarwiiye vamuthukumanoni. Kootthuniheriwa oxaya muttetthe awe. Ni kikelaka, epasaporte aka ni sothene enihimya mulipa-ooxaya, kahi muthukumano wa etiini.

<sup>352</sup> Vano onoorowa okhala munna mmosa onrowa okumana ni miyo, ni wira, "Muhinkhalanel-a-ni muthukumano mwaamukhaani wa hiyo?" Istaatiyu soorentteriwa. Awo hata khansuwela. Munnona? Oh, ovuwa!

<sup>353</sup> Kinvekela wira otthuna wa Muluku ohikhooitiheriwe. Mwaha wa yeeyo, munepa aka oninlelakaaya wAfrika okhuma okathi okhummyaaka-wo, vaweryaneye otthikelawo-tho, nto kooruuuheleni ihapari sa muthukumano muulupale. Alakela nkinrowa owoonani-tho, okhuma olelo, mpakha miyo otthika.

Ninrowa, mahiku vakhani paahi vano, mahiku yeettaka muloko a Maayu. Munookivekelela?

<sup>354</sup> Muupuwewe, nyuwo khamunsuwela iye sikhanle mikattyamiho, mpakha ophiya weiwo; akhwiri khula epantte, ni xetwani, ni muhuupuwewe wira khansuwela etthu yo wira. Munnona? Ni vanreerela musuwele etthu enihimyaanyu, mwakhala ohoho waya. "Masi koomusuwela Ole omwaamini aka, ni kookupali wira Owo onniwerya osuka ele miyo envaherenryaaka Yoowo wa nihiku nenlo."

Vano, aakhala maleeso kamosa-kamosa apwehiwe va.

<sup>355</sup> Muluku Oophentiwa, ntoko Mutthak'ola voosis'ula, wa ohihimuwa, ni miyo keemenle va, Pwiya, ni kooniheryaka ni Masu wira Owerya iwo woovaha ekumi ori mwa mwaana onaamini. Tivo, mwaha wo waamini, mwa waamini, wira Owerya iwo woovaha ekumi woorukunxa makhalelo aka. Ni atthu ala annaamini, Pwiya, ni Owo woorukunxa makhalelo aya. Ni ninnivekelelana mmosa ni mukhw'awe.

<sup>356</sup> Miyo kiniixaatherya matata aka maleeso ala, wira... Muluku, Ole onvanhe ekumi Yesu Kristu ni khimuruuhu okhuma mw'alipa-ookhwa, ni Erooho yeeyo emuhihimunxe Owo mw'alipa-ookhwa, ekhalaka mw'erutthuni mwahu.

<sup>357</sup> Erooho yaari mw'erutthuni mwa Elisewu, yoowo, vaamanlyaaawe okhwa ni khuhikhala etthu woohikhala makhua, yaahikhalana Owerya woovaha ekumi mwemmo. Matata a arummwa yaahikhalana Owerya woovaha ekumi. Muupuwelo w'arummwa, woona w'arummwa, ma—malumi a alipa-oowaamini, sothene saahikhalana Owerya woovaha ekumi.

<sup>358</sup> Vano Owerya yoowo woovaha ekumi, kihelaka Masu ala vasulu vaya, ni matat'aka wira emuthoonyerye namakhalana, ni mahala, wa Owerya iwo woovaha ekumi, Owo ovahé ekumi khula emosa wa irutthu iya sinwereiwa, ni awo avonihiwe-tho, Muluku, mwa Nsina na Yesu Kristu.

<sup>359</sup> Ehikhale paahi ya maleeso ala, masi w'atthu ale vamuthukumanoni vale, atthu othene anihaaxeya. Axinamwane ale, aalweene, anakhaleru aani, Owerya iwo woovaha ekumi waavahe ekumi naanaano va, mwa Nsina na Yesu. Amen.

<sup>360</sup> Vano, akavi arina Owerya woovaha ekumi? Vano mwiixatheryane matata mmosa ni mukhw'awe, vakhala wira Owerya iwo woovaha ekumi ori mwa nyuwo.

<sup>361</sup> Vano, eri etthu emosa paahi ekhanle okhoottihaka Eyo, okhoottiha, iwo ohaamini wanyu. Muthiyana mmosa aahikwannya nlaya Nawe, khuvonihwa; nakhotto muRooma aahimusenyela wiitho Wawe, khurowa omooroni. Munnona? Vano eyo yaarina...eyo entthariha vatthu vary'anju. Munnaamini Yeeyo? Munnaamini Yeeyo?

<sup>362</sup> Vano kintthuna wira muuramihe muru ni nvekelelane mmosa ni mukhw'awe. Paahi—nvekele vancipale paahi, mwiire, "Pwiya, mutth'ula" . . . Moone, nvekelelane mmosa ni mukhw'awe.

<sup>363</sup> Muluku Oophentiwa, hiyo niniira ela mwa Nsina na Yesu Kristu, Nsina nimosa paahi nivaheriwe eriyari y'atthu mwa nenlo naakhanly'ahu woopowaka wala ovonihawa. Atthu ala, akhanle anammuttettheni a Momweneni, anamakhalana Owerya woovaha ekumi, waavahe ekumi awo, Pwiya, naanaano va. Ni wira Erooho ekhume mwa xawawe mpakha xawawe, okhuma Masu mpakha Masu, mpakha omalela wa Yesu Kristu wooniheriwe mwa khula emosa wa irutthu, wa erutthu, erooho, wala etthu p'ithtu enthunaaya, niixaatheryanaka matata mmosa ni mukhw'awe. Mwa Nsina na Yesu Kristu. 

**65-0418M Ti Okhuma Wa Nsuwa  
Branham Tabernacle  
Jeffersonville, Indiana wAmerika**

EMAKHUWA

©2024 VGR, ALL RIGHTS RESERVED

**VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
www.branham.org**

## Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinvwa ethu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumiheweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthunikeriwa woolempwa ni Voice Of God Recordings®. Mwaaphavelaka wiiwa-tho wala ikaruma sikina sikhanle, xontte mulavule ni:

**VOICE OF GOD RECORDINGS**

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)